


民國叢書

第五編

• 95 •



民國叢書

第五編

· 95 ·

綜合類

茹經堂文集（三一六）

唐文治著

上海書店

唐文治著

茹經堂文集
第五編

本書據1945年版影印

余行年五十後專心講學惟以正人心救民命爲宗旨或曰君夙夜講貫於正人心一端或可收效矣君夫救民命一事現在滿目瘡痍野有鴻嗷屋無烏止豈無尺寸之柄者所能措手乎余曰不然人患不立志耳苟立志拯民於水火之中曉音瘖口以宣傳之著書立說以緣督之人性皆善必有聞吾言而興起者一人傳十十人傳百小以成小大以成大舉世之士皆以擔任救民爲事安在無同聲相應同氣相求者即以吾婁一隅而論設立粥廠已閱七年同鄉諸君協力贊助賑濟鄉民自七百戶陸續達九百戶未始無小小之補苴也拙著文集初二三四編大都以正人心救民命爲當務之急已由及門金叔初張貢九朱貫微孫煜峯諸君子先後印行其原委具詳余所作四集跋中乙酉春正六日執友嘉定陳仲達先生偕舊時太屬中學同學吳君拯寰瞿君西華過從蓋余長中學時敦請陳先生爲教授兼訓育而吳瞿二君則中學中之翹楚也諄諄以印行文集五編爲言余以邇者紙工奇昂費尤艱鉅固辭之而吳瞿二君堅請且云有潘君仰堯鄒君鶴白可同任剗剛之資余不獲已將原稿授之憶余任太屬中學監督時每月由滬返婁一次必在禮堂聚集諸生講修養道德之方與國文進步之門徑諸同學靡不虛心聽講覃思研慮用是人才輩出在政界學界傳聲學說而卓然有以自立者指不勝屈余嘗謂教育之樂不必盡得天下之英才也卽吾郡屬之英才已項背相望矣宣聖之樂以忘憂非所敢望而亞聖成德達材之選彬彬然恂恂然豈非人間之至樂哉夫傳道之志願不在形迹而在精神惟望諸同學以余學說傳播社會播諸寰區庶幾如孝經所謂天下和平災害不生禍亂不作是余旦夕所期望之者已乙酉莫春之月蔚芝唐文治

茹經堂文集五編目錄

卷一 雜著類

追記母病二則 甲申

壬午九月患膀胱證自述 壬午

論不忍 癸未

述徐楊二太翁行善事 癸未

論行善爲吾輩之天職 癸未

論行善當先人後己 癸未

論國家善氣惡氣關係廢興存亡 癸未

積勸善救民篇 癸未

勸惜字文 己卯

人生三不及論 乙酉

茹經堂文集五編卷一

太倉唐文治蔚芝著

雜著類

追記母病二則甲申

人生當世自懷抱以至成立惟父母是賴故詩曰無父何怙無母何恃竊謂蓼莪詩第三章父兮生我以下九我宇不啻搆魂攝魄凡人暇時三復蓼莪詩及孟子牛山之木兩章孝思常存卽良心不泯不孝侍親無狀然幼時之事常呈露於本心敬鳴咽追記二則願天下人子皆及時以盡孝曾子有言父母既沒雖欲孝誰爲孝乎毋追悔於無及也

不孝三歲時歲次丁卯吾母胡太夫人忽患小產時已懷妊六個月矣昏暈數次至於不省人事不孝略有知覺某夜三更昏暈極盛時不孝跪牀前伏牀沿邊吾母暈略醒見不孝甚駭強以手摩兒頂曰是兒耶不孝泣應曰然母曰速起睡余足旁不孝喜強起臥吾母病半月後始愈蓋其時吾父處館蘇州家貧甚臨產時僅雇一女媪已早睡矣至今追思之不禁流涕也

吾母素患肝鬱病發時頭暈甚至不省人事不孝十四歲戊寅春正月某夜母暈絕數四口不能言時賃居南牌坊西趙家廳下孝惶急無路狂奔至城隍廟天尙未明廟門已閉不孝卽趨詣神像前叩頭無數誓死以身代母叩禱數四天已明發瞥見泥塑皂隸猙獰狀大怖狂奔回家先姊啓門曰弟焉往吾不見弟

厥欲死矣不孝急問母暈何如姊曰幸頃已稍蘇弟勿可再禱求不孝急詣房中呼母呻吟而應越十數年遷至大橋南王大吉藥肆房屋吾母心境稍舒又請浙醫沈雲程先生診視用白鳳丸療治肝疾始痊憶執友曹君叔彥有詩曰回思中夜祈天日猶是吾生最幸時蓋言吾親尚在也今吾親棄養久矣嗚呼痛哉

壬午九月患膀胱證自述（附陳邦典醫師治療方法）壬午

余所患爲老年性攝護腺肥大症已有數年之久初時每夜小便一二次以後與時俱進逐漸增加最後日間小便亦尿量不多而次數迭增原其所以如此因小便後尚有剩餘尿留在膀胱故也至壬午年九月甚且有一二日小便不通僅溢流少許並不自覺余病勢既見嚴重由及門表姪醫生朱君增宗紹介同鄉嘉定陳邦典先生來診察陳泌尿專科家也乃於壬午舊歷十月初三日進體仁醫院當用導尿管從尿道通入膀胱先放儲尿三百西西此後每一小時續放一百西西至二十餘小時放盡儲尿既經積累時日放尿亦不宜速在頃刻除在導尿時期所進飲料之尿量酌除不計外當時儲尿竟有二千西西左右之多此數較常人尿量多出五六倍則知膀胱之脹大有如此其痛苦可想見矣然由來已久亦非一朝一夕所致也自此以後余在醫院中仍藉導尿管排尿並常洗滌膀胱每星期換管一二次一面注射舉丸內分泌製劑作排尿試驗數次同時會試用中國祕製丸藥但均歸無效於是準備攝護腺摘除手術以期根治先作身體總檢查無如化驗尿汁與血液有發炎及尿毒初起現象照膀胱鏡知膀胱與攝護腺腫脹甚試驗腎臟又係排洩工作失常他若肺部更患慢性氣管炎恐開刀後咳嗽頻作足使創口傷痛益以余年近八旬精力較遜有此種種原因與其輕試根治手術反多冒險不如退一步想先施假道手術較爲安全所謂兩

害相權取其輕之意也因商請曹農濤醫師會診意見相同並徵得余家屬同意遂於舊歷十月十八日上午用局部麻醉施行膀胱開口手術爰從小腹到膀胱開一孔並用橡皮管通入膀胱以爲小便臨時出路朱君亦參加襄助歷半小時經過良好余回病房後尿由橡皮管中源源流出其流出之一端懸以一瓶爲貯尿之用後來起身行走改用橡皮製貯水袋可繫諸股脛之間尙無不便至十一月初四日由體仁醫院用病車送余平安出院按鄙人行年八十自經曩年陳醫師治療重證後起居飲食動靜自如而現在出外講學酬應均與從前無異近體尤極舒適感不去懷爰就在醫院時臨診所得敘述如次並附錄陳醫師治療方法俾世之同病者知所問津焉

老年性攝護腺肥大症治療須知

- 一 凡年在五十歲以上之男子夜間小便一二次或較多時即須請專家醫師詳細診察如此症初起可注射藥丸內分泌劑即能見效否則心臟腎臟以及血壓等後來亦有漸受影響之可慮
- 二 如至割治程度醫師認爲須用手術時倘病者身體健全宜從早施行萬不可蹉跎玩忽坐待小便突然閉塞發生嚴重情勢
- 三 若不從速醫治卽有生命之虞其醫治方法先用導尿法放清儲尿再作身體總檢查以定手術之施行

四 倘檢查結果病者心臟腎臟或其他部份均有不健全現象認爲開刀指摘除不合格祇可仍用導尿法勿使儲水或用膀胱開口術俾小便得有臨時出路一面將息調理俟受病各部份健全時

始可爲攝護腺摘除手術但須聽醫師決定務以安全爲目的

五 在此科學昌明時代醫學亦力求進步外國最近發明一種電摘鏡可從尿道摘出攝護腺不必用開刀手術將來瀝地各大醫院有此種設備時改用電鏡摘除手術較爲安全

論不忍癸末

乾坤之所以不息者生人不忍之心維繫之也何言之易傳天地之大德曰生又曰生生之謂易生生者不忍之根源也不忍之心滅乾坤或幾乎息矣孟子曰人皆有不忍人之心人字重讀苟無不忍之心非人也又曰今人乍見孺子將入於井皆有怵惕惻隱之心睢州湯潛庵先生諱斌 文正謂學者以此二語常存於心即可上達天德此言何謂哉蓋怵惕惻隱之心良知也良知不忍之所發也孟子見梁襄王問天下惡乎定對曰定於一孰能一之對曰不嗜殺人者能一之不嗜殺人非不殺人不嗜者不忍也齊宣不忍殺一牛孟子許之以王曰臣固知王之不忍也又曰君子之於禽獸也見其生不忍見其死聞其聲不忍食其肉宋蘇子瞻引伸其義曰殺人者譬如屠殺牛羊割割魚鼈以爲饕餮食者甚美見食者甚苦使見其號呼於刀俎之間宛轉於挺刃之下雖八珍之美亦將投筯而不忍食矣仁哉斯言物猶如此人何以堪今茲蒿目縱觀野有餓殍白骨纍纍號呼慘怛者不可勝數目不忍睹耳不忍聞嗚呼吾之所見所聞者如此其不得見不得聞者不知幾千萬也苟不拯諸水火之中而俾之得所於心其何忍乎而人且曰天演之理如是也嗚呼此忍心害理之說也或又曰吾欲救之而力有未逮也嗚呼力不足者獨不可勝於口說傳於文字乎二人播之口說傳之文字什百人應而和之則有力救人者出矣余向作慈幼保種篇以爲一家之人種寥

落則一鄉一邑之人種寥落而一國之人種可危矣有限者生命無盡者干戈草薶禽獮人民其何罪乎按諸字義忍字從刃從心形聲而會意人苟以刃加於心有不好殺人者乎有不轉刃以自殺而並殺其子孫者乎曾子曰出乎爾者反乎爾者也孟子曰殺人之父人亦殺其父殺人之兄人亦殺其兄未有不報者雖悔其何及矣吾悲夫輾轉流離號呼慘怛者之日衆也吾悲夫吾國人種將零落而衰替也吾悲夫加刃於其心轉刃以自殺而殺其子孫也於是乎論不忍

述徐楊二太翁行善事癸未

崑山徐太翁佚其名性落拓人咸以爲狂清初親王某邸下江南其部曲沿途略婦女約三千人某邸與太翁爲舊相識聞其在鄉間有大樓十餘楹與謀安頓並與給養費太翁欣然曰諾吾當爲分部以居之嚴防走失某邸喜甚遂遷入越數日太翁度其去遠大購牛羊豕骨人以其落拓也不之詢又越數日僦大舟十餘艘密詢遠省婦女曰汝等欲歸乎則大喜應曰求速歸遂於夜靜時遣婦女登舟擇平日之司事誠實者集河干告之曰吾以此十數艘婦女請君等護送各回本籍倘中途有鬻賣或曖昧事上有神明果報不爽親頓首以誓並謝諸君遂稽顙有聲司事皆感動曰敢不惟命舟中婦女聞之皆泣下泊舟回又分遣略近與最近者數次遣畢某夜忽樓中火起煙燄迷漫不可鄉邇人不及救昧爽則見焦骨纍纍咸曰太翁已焚死矣越歲餘某邸回有告知其事者某邸親往視祭酒淚曰人多易於失慎吾累吾友矣遂去又越數年太翁忽同人詢之則微笑曰吾幸脫於火難耳是歲適值鄉試吳俗鏡聽占中否太翁有三子長曰乾學健聞太翁語曰一門三鼎甲以太翁之偶語也末之信復行數十步遇一醉人忽語之曰汝父言不錯已而果

然乾學顯貴至宰相人咸羨其功名之赫奕也而不知太翁積善所致也

余居京師時設帳常熟翁文恭公宅中甲午午得見無錫楊藝芳太翁謙恭而和望而知爲仁人長者已而聞其在李文忠公鴻章幕中積善甚夥李公平粵匪克崑山而蘇州而無錫而常州而鎮江每克一處太翁必於四城門外距城約三四里分設粥廠十餘處饑民雲集流徙他處者亦皆來歸惠澤所被沾溉及於子孫庇蔭無極方今鴻嗷遍野啼飢號寒之衆所在皆是幾於目不忍睹耳不忍聞救濟之法惟有多設粥廠但米價昂貴不易得當間以雜糧有如大菜館大飯店大旅館每日宜將餒餘之食攪和成粥於晚間惠施飢民全活亦當不少居今之時惟有忱惕惻隱孳孳爲善庶可留後福於將來此等善機善緣萬不可失深望諸仁人君子盡力拯救勿錯過機會也

論行善爲吾輩之天職 癸未

孟子言禹思天下有溺者由己溺之也稷思天下有飢者由己飢之也禹爲司空稷爲農官豈其責任固當如是乎古之聖人一夫不得其所曰時予之辜是時即非吾之責任者亦當引爲天職孔子所謂當仁不讓是也堯之治天下也曰一民飢吾飢之一民寒吾寒之一民有罪吾陷之堯舜之世所稱大同之治也其有能實行之者乎癸未之冬歲禾不登百貨轉運維艱當斯時也寒威栗烈無衣無褐者踵相接飢寒顛踣以死者不知凡幾將來野有餓殍白骨如山痛乎哉吾國民也余擬補孟子之文曰思天下有寒者由己寒之也而輒轉流離號呼無告者尤當亟爲之拯救也詩云嗚矣富人哀此癯獨非嘉美富人言富人皆當哀此癯獨者也此天職也孟子曰周於利者凶年不能殺周於德者邪世不能亂夫周於利者何爲乎非欲推其

利以救吾民乎苟專利而不知救民其利庸可保乎顧亭林先生曰天下存亡匹夫有責非先以救民爲先務之急乎非吾輩之天職乎

論行善當先人而後己癸未

聖人先人而後己賢者推己以及人愚不肖有己而無人何言之禮記坊記篇子言之善則稱人過則稱己則民不爭善則稱人而怨益亡此先人後己之說也論語孔子告子貢曰己所不欲勿施於人他日又告之曰己欲立而立人已欲達而達人能近取譬可謂仁之方譬者以己譬人以人譬己也譬如我欲處於富貴而處人於貧賤我必處於安樂而處人於困苦天下有是理乎如是則人心交怨而不平不平則相爭甚至相奪相殺而天下亂一家如是一國亦如是世界之所以擾攘而不安者皆人之間隔爲之也是以大舜有大焉舍己從人先人而後己也老吾老及人之老幼吾幼及人之幼推恩保四海推己以及人也傲很明德惟己獨尊貪黷無厭剝民脂膏詭詭之聲音顏色距人於千里之外祇有己之見絕無人之見國民性質漸染淪胥而乾坤幾乎息矣夫仁者人相耦也从人从二其一爲我其二則對於我者不知幾千萬人也以一人之血氣心知而欲與千萬人之血氣心知相角逐庸可勝乎且己心勝則轉而爲忌忌从己蛇也安有蛇蟠於心而不螫人且自螫以死者乎吾悲夫人己之見紛紜交鬪而世界阨隘而不安也特大聲疾呼曰今日行善當先去人之己之見

論國家善氣惡氣關係廢興存亡癸未

宋程子白土君子處治世則德行日進處亂世則德行日退何也一則善氣滋一則惡氣漬也斯言於古有

微乎曰有之曾子言與善人居莖乎如入芝蘭之室久而不聞則與之化矣與惡人居貨乎與也如入鮑魚之肆久而不聞則與之化矣善氣惡氣之沈浸旁薄在無形之中與之俱化可懼哉孟子曰君子之澤五世而斬小人之澤五世而斬澤者氣之鬱蒸而成者也孟子蓋隱據周易世卦之義亦有未至五世而先斬者矣易傳積善之家必餘慶善氣積則發而爲慶積不善之家必餘殃惡氣積則釀而爲殃豈造物者記於其間哉故又曰善不積不足以成名惡不積不足以滅身君子居其室出其言善則千里之外應之應之者善氣相感召也居其室出其言不善則千里之外違之違之者惡氣勝則善氣消也今試驗諸念慮之微一念正直則善氣應之一念邪曲則惡氣隨之古語所謂惡迪吉從逆凶惟影響是也又試驗諸言語事爲氣善則言語善事爲善清明在躬志氣如神矣氣惡則言語惡事爲惡卑鄙齷齪刻剗無所不至矣又試驗諸一家一鄉一邑德鄰仁里皆善氣之感通也保抱揣持以哀籲天哀我墳寡宜岸宜獄皆惡氣之腥聞也又試驗諸上古蚩尤作亂鴟義奸宄泯泯焚焚蒸而爲霧瘴厲天札於是興焉惡氣之盛也中天之世虛雲糾縷南風之薰可解民憂善氣盛也洪範蕭又哲謀聖善氣也狂僭豫急蒙惡氣也天人相與之際可畏之至也下迨夏商周而後興滅終始無非善惡之氣迭爲消長縱橫億萬里上下數千年國家將興必有禎祥國家將亡必有妖孽善必先知之不善亦必先知之至誠如神者驗其氣也先儒有言子弟權詩書之氣則莫不聰明子弟吸金銀之氣則莫不愚蠢飲其氣而然也禮孔子閒居篇曰志氣塞乎天地正明目而視之不可得而見也傾耳而聽之不可得而聞也其論至爲精審孟子又申言之曰志氣之帥也志至焉氣次焉宋文文山作正氣歌曰是氣所磅礴凜烈萬古存三綱實繫命道義爲之根此卽浩然之氣也吾輩欲

養正氣爲善而已矣

余前作釋氣篇頗極紛紜瑣瑣之觀此篇宗旨在勸人爲善世界多善氣則國性皆善矣是太平之基也與釋氣篇用意略異茹經自記

續勸善救民篇癸未

前作勸善救民篇踰一年國難未已滿目瘡痍痛甚於昔勸善子曰嗚呼孟子言雞鳴而起孳孳爲善者舜之徒又言樂善不倦今日一大戰國也救之之道彊爲善而已矣古之聖人視民如傷而積善長久者莫若周文王文王發政施仁必先鰥寡孤獨蓋此四者窮民無告救之不容須臾緩也詩云嗇矣富人哀此鰥獨竊願富人皆哀鰥獨則其積善於子孫者固無涯涘其有益於國家亦非淺鮮也

孟子言西伯善養老治其田里教之樹畜導民妻子使養其老所以廣天下之大孝也今宜勸善人君子多設安老院蓋老而無依者往往鰥而兼獨或窮困不能行動或殘廢疾病無人扶持鬱急而死者衆矣有安老院則可使得所其識字者多置書籍報紙俾資解悶其身體較健者略爲工作俾資生活之助至其居處務使空氣流通不可淤陰男女亦宜分處此爲老人馨香以祝之者也

其二曰廣設慈幼院余前作慈幼保種篇已詳言之今日之難童流離於道路者慘不忍言矣問其姓不知也問其名不明也覽其形狀飢餓而垂斃也聆其言語哀痛而迫切也曰吾父母棄我之時號哭不能止也吾牽衣追之父母尙揮涕而躊躇也嗚呼此難童也人種之攸關也非余救之而誰也然則慈幼院不可不急設也其法分嬰孩幼稚爲一區乳哺照拂務使慈惠精細者司之分五歲以上者爲一區保姆管領之可

教以識字讀書矣分十歲以上者爲一區師傅管領之教以讀書可漸就職業矣而其尤要者凡四五歲以上兒童能記其父母姓名及本鄉住址者除記錄入冊外每名宜於胸前各掛一小牌寫明父母姓名及地址令其不忘父母親念書曰如保赤子孔子曰少者懷之其爲積德也大矣

其三曰廣設敬節院聞故老相傳曾文正筦兩江總督逝世後清節堂節婦均臨喪痛哭或問之則曰大帥每月必蒞堂數次稽查詰誠男司事毋得有戲謔傲慢之容女司事毋得有怠惰倔強之習闔堂感戴大德今已矣于此可見先輩辦事之愼勤今擬易清節堂爲敬節院易曰苦節貞凶又曰甘節吉能安苦如甘自當敬之而弗渝蓋禮義廉恥之大防首在於是矣

以上曰安老院曰慈幼院曰敬節院如力能兼設固盡善矣不能則獨設一院亦可規模較小者則稱爲會鄙人前設有敬節會深愧力量棉薄然藉此以資生活者亦得苦度難關前數年鄙人有言能以拾圓救一命是大便宜事現在能以數十元或百元救一命亦可謂大便宜矣時艱日亟爲善機會萬不可失同志之士其勉之哉其勉之哉

勸惜字文已卯

凡不愛惜五穀者其人必弱不愛惜字紙者其人必賤感應之理然也憶文治年十一歲時拋棄一火柴匣先母怒之文治對曰此不過洋文耳先母大怒曰洋文非文字乎汝不讀洋文遂輕棄洋文乎汝惟不愛惜文字所以讀經書不能純熟汝亦知中西文之一體貴重乎文治聞之悚然銘心刻骨迨年長始知中國文字與西國文字同爲文化大樞紐而文化之盛衰卽爲國家存亡之大樞紐先母之訓世世子孫當永守者

也同鄉某戚用報紙包遺矢擲諸院外人勸之則曰西法不貴字紙後得絞腸痛病號呼宛轉數十日而死嗚呼吾嘗遊歐美各國從未見有字紙飛揚道路國人皆尊重其本國文字至廁中異常潔淨草紙各齊備輪舟火車中均如此何嘗有用報紙擦遺矢之事今乃糟蹋字紙自號文明酷受慘報可笑尤可痛恨也人生天地間無論士農工商輩無日不食穀無日不寫字乃昏昧自忘本根此浩劫所由起再不醒悟劫運何所底止乎今宜定辦法學校中設立惜字會磚砌焚化字紙所簡單者用鏟除焚化本校字紙外並飭校工於暇時檢拾街上字紙負竹筐用竹鉗見有字紙即收入筐內歸後細檢有汗穢者用清水漂淨晒乾一律焚化將字紙灰包固拋入大川一面由同志捐款多購字簍簍上黏貼勸惜字文酌送各戶輾轉勸導最宜注意者報紙狼藉切勿糟蹋蓋珍重字紙先宜珍重報紙充珍重報紙之心以珍重書籍庶幾文化日隆國運其復興乎友人崇明王丹揆先生文集中有惜字小引余特師其意爲勸惜字文大雅君子勿迂視之幸甚

人生三不及論乙酉

人生世界間有三不及慎毋追悔於將來一曰孝有不及凡人百年之中有疾病焉有老幼焉君子思其不可復者而先施焉父母既歿雖欲孝誰爲孝乎年既耆艾雖欲弟誰爲弟乎故孝有不及弟有不時其此之謂乎以上大雅能無痛乎讀孝經紀孝行章之五致惟居則致敬養則致樂爲人子承歡膝下之時乃未幾而病則致憂矣未幾而喪則致哀祭則致嚴矣夫往而不反者年也逝而不可追者親也此皆子小草庇蔭下春暉庸能久駐乎其可痛何如乎宋歐陽子曰祭而豐不如養之薄也爲人子者可不及時以盡

孝乎二曰學有不及論語言學如不及猶恐失之縱覽後世學者失之者多而得之者千百人中不過得一二非其以玩時而愒日乎後生可畏不轉瞬至於四五十而無聞則虛生於世矣老冉冉其將至痛修名之不立大易之朝乾夕惕卜子之日知其所亡月無忘其所能其可不隨時提撕以警覺吾心乎晉陶侃云大禹惜寸陰吾輩當惜分陰學者可不以此語書紳而銘座右流光之迅速若駟之過隙詎可不珍惜乎三曰爲善有不及論語言見善如不及又言善人吾不得而見果何謂乎豈不以善幾稍縱而卽逝乎凡人發生善念如電光石火而善因亦如電光石火吾妻某君偶行於路見道旁幼童蹣跚踣詢之則謂太倉人也此童將涕泣陳詞矣而某君適以他事舍去迨明日求之則渺不可復見矣某君至今引以爲歎嗚呼此幼童豈已填溝壑中乎其可痛惜何如乎余嘗作放賑急救法刊入勸善編中言救人如救火蓋天下事未有急於救人命者也余因憶甲子年施賑衣發護照較遲延鹿河凍斃老嫗一新豐凍斃小孩一至今引爲大恨痛乎施粥施衣其可遷延不決濡滯不前乎古人言善念之起鬼神鑒之吾謂不啻鬼神促之善緣一去殃禍有不隨之者乎吾是以紀之以自勉以勉子孫且以勉同志之倫大聲而疾呼曰人生有三不及愼毋追悔於將來

茹經堂文集五編目錄

卷二 雜著類

論孝道之要 戊寅

論妖孽 戊寅

儉德非食約 戊寅

天問歌言感辭 戊寅

香港孔道學院演講錄 戊寅

辭賀重宴鹿鳴文 壬午

孫君煜峯五子字說 甲申

香草居題詞 甲申

任琪女士懸壺紀念訓辭 乙酉

孝純孫女大學畢業訓辭 乙酉

胡君春臺收藏先哲書畫題辭 乙酉

茹經堂文集五編卷二目錄

如經堂文集五編卷二

太倉唐文治蔚芝著

雜著類

論孝道之要戊寅

凡孝之道先在自愛其身孝經所謂身體髮膚不敢毀傷是也惟不毀傷其身體尤須不毀傷其心性神明孟子言世俗之不孝有惰其四肢五者皆毀傷身體之事也禮記祭義篇曾子言士人之非孝有五居處不莊五者皆毀傷心性之事也孟子曰不失其身而能事其親者吾聞之矣失其身而能事其親者吾未之聞也何以能不失其身自愛其身而已矣是故不登高不臨深自愛也不服闋言不爲時不登危言不爲危自愛也居上不驕爲下不亂在醜不爭皆自愛也不取非分之財不蹈非法之行兢兢焉業業焉則禍患不及其身矣

進而上之勉爲君子勿爲小人子曰君子喻於義小人喻於利義利者君子小人之分途實人心生死之界也人而墮落爲小人不孝莫大焉大學曰不仁者以身發財吾國民以發財爲口頭語趨利若鶩於是禮義廉恥掃地無餘常以非分之財供奉其親嗚呼以清白之軀而貪污如是此白華之詩孝子所以貴潔養也風俗惡劣一蹶不振伊誰之責哉

又進而上之則爲尊親孟子曰孝子之至莫大乎尊親尊親之至莫大乎以天下養或疑恐開僭竊之漸其

實非也禮記孔子對魯哀公曰仁人事天如事親事親如事天雖畎畝之中儼然有嚴父配天之氣象尊之至者在心而不在迹也更有進者孔子孟子之尊親後人爲立崇聖祠於聖廟之後所以昭尊親之典至隆也乃近聞各縣崇聖祠多有利用其地而拆毀之者嗚呼人孰無親度先聖先賢在天之靈必覺然而不安余嘗作崇聖祠急宜恢復議實於振興人心風俗非細故也

又進而上之則大孝通於神明矣孝經曰昔者明王事父孝故事天明事母孝故事地祭天地明祭神明彰矣覺其言之廣大而無涯既而思之事父之與事天事母之與事地其分雖殊而其利則一擴而充之而已虞舜大孝人也孟子贊之曰明於庶物察於人倫所謂神明彰也而其精意則曲禮所謂視於無形聽於無聲爲人子者能於無形無聲之中常體察父母之志意順而行之其心日益精細對於萬事萬物自能因應中節所謂致中和也故曰君子之道造端乎夫婦及其致也察乎天地豈高遠哉神而明之存乎其人又進而徵之於諸經考其勸孝之方周易心學之書也易感孝思觀於乾坤生六子卦又生十二辟卦又生六十四卦生生之謂易孝思油然而生矣尙書首篇美虞舜克諧以孝周公作詩曰永世克孝召公作詩曰有孝有德成康之世詩人頌揚曰孝子不匱永錫爾類又曰永言孝思孝思維則魯頌詩亦曰靡有不孝自求伊祜至於變風變雅若陟岵若揚羽若蓼莪悱惻離憂可歌可泣矣士禮十七篇無非歸本於孝曾子饋喪禮泣下霑襟其感人如此大戴禮記言孝詳於曾子大孝立孝而尤精於疾病篇小戴禮記言孝節目詳於曲禮內則文王世子諸篇而尤精於內則篇曾子之言至參考書以明代黃石齋先生孝經集傳抉經之心爲千古不刊之作宜頒諸學校俾生徒熟誦而服膺之也

論妖孽皮質

中庸曰國家將亡必有妖孽禍福將至善必先知之不善必先知之妖孽者何或曰如龍螯之產喪氏是也吾謂不然殷高宗彤日越有雉鳴鳳鳴朝陽而成康以興鸞集朝堂而隋煬以亡於此爲瑞於彼爲孽此難知者也左氏傳曰妖由人興也人棄常則有妖孽常者悖仁義禮智信五常之德反父子君臣夫婦兄弟朋友之倫賊性理溺奇衰侮慢賢荒道敗德是謂之妖此易知者也其說之來也無端其萬口附和也無迹如醉如狂如噎如游魂如落魄如墮雲霧如憑鬼物於傳如神降於莘如言出於石維恍維惚莫可紀極無以名之之曰孽此難知者也孟子論一治一亂曰暴君代作國囿汙池沛澤多而禽獸至此獸妖也及紂之身天下又大亂此人妖也春秋時臣弑君子弑父人妖也戰國時楊朱墨翟之言充塞仁義率獸食人將相食獸妖與人妖合焉者也可能有形或無形者也變天之道絕地之理概以爲不足信於是九宇山川魑魅罔兩之物皆出而爲妖孽是心術之妖無形者也言語譎詭衣服冶淫機事譎張飲鳩毒酣舞場角雉戲形形色色怪怪奇奇是事爲之孽有形者也孔子曰素隱行怪後世有述吾弗爲之天下之妖靡不根茲於行怪是學說之妖無形者也孝經曰五刑之屬三千而罪莫大於不孝要君者無上非聖人者無法非孝者無親此大亂之道惟有無上無法無親之學說而後有要君非聖非孝之事實此有形而根於無形者也有形者易辨無形者難知也天之意若曰元惡大懲矧惟不孝不友是妖孽也其速由周文王刑茲無赦夷狄之汨陳猛獸之搏噬是妖孽也其速由周公兼之驅之周魯所賦春秋戰國利慾障塞百川橫流其速由孔子孟子平天下之妖除天下之孽凡一代之混亂必生一代之聖賢聖苦卓絕旋乾轉坤以正人心以息

邪說以抹生民霹靂震空而蚩霧滅泯囿靈經天而寰宇麗明大道之行三代之英盜竊不作災害不生立斯立道斯行過者化存者神其在斯乎其在斯乎

儉德非食約戊寅

易否卦大象傳曰君子以儉德辟難宋楊誠齋先生易傳曰惟能忍天下不可忍之窮乃能避天下不可避之難旨哉得素患難之道矣禹平洪水之難極人世不堪之苦然後中國可得而食其功德東漸西被暨朔南聲教訖四海孔子贊其無間之德首曰非飲食余嘗推言之曰能忍天下不能忍之苦斯能平天下不能平之難易頤卦自求口實言能自養也由是而養賢以養萬民大象傳曰君子以節飲食自古貪口腹之累者未有不爲心害者也今爲避難計爲救民計爲興國計請採用吾言

文治幼時聞崑山朱柏廬先生款客不過錢七十文厥後略有知識隨侍先大夫款客不過制錢二千元較朱先生時幾加二十倍餘矣以近時之款客較先大夫時不幾加至五六十倍乎奢侈愈甚世界愈窮余初官京師時款客不過銀四五兩迄今日而飲食若流流連荒亡無所底止嗚呼此非危亡之先兆乎

憶光緒丙戌丁亥間江西水災告急吾妻設捐振處時先大夫館城北陸氏館主名錦采學徒智賢智海等值歲莫放假肅東宴師先大夫謂智賢等曰汝輩可攜席費四金隨我往捐振取收據交汝翁吾固願飲酒明日祇須素菜四盞費不得過一金翼日文治隨往館主奉命惟謹飲盡歡而散自粵匪難平後太邑漸由儉入奢先大夫恆愀然曰老人洗腆宜流餘慶小兒初生當貽哲命世俗一是鋪張揚厲是轉爲老人小兒造孽也盡分餘貲以周貧乏乎至於嫁娶品節禮有常經今糜費無限是致貧之道風俗之大憂也當是時

先師瑞安黃漱蘭先生督學江蘇素豪飲伏臘休醴每次飲酒以十五斤爲度僅食榛子或杏仁數枚供張滿漢酒席概設屏弗御曰眞飲酒者當如是今人自命善飲而不免饕餮非特有妨衛生亦豈雄豪之量哉謹述先大夫仁儉之訓與先師眞酒量如此

凡生於天地之間者皆曰命人愛其命萬物亦各愛其命孟子曰仁民愛物君子之於禽獸見其生不忍見其死宋蘇子瞻代張方平諫用兵書曰譬諸宰割牛羊魚鼈以爲膳羞食者甚美被食者甚苦使見其號呼於刀俎之間宛轉於槌刃之下雖八珍之美亦將投箸而不忍食此眞仁人之言也際茲國難爲古今中外數千年來未有之慘禍今日吾國民之性命亦猶之牛羊也猶之魚鼈也他日吾輩之性命亦猶之牛羊也猶之魚鼈也一念及此愧惕惻隱之不暇尙忍大嚼乎今雖不能效釋氏之戒殺亦當體天地生生之心節物力以全物命爰與同志約此後宴會菜肴當葷素相間每席七八人以八簋爲率至多不得踰十簋違者罰款救濟難民

天問獸言感辭戊寅

古之人有託於禽言者鷓鴣之詩是也綢繆關戶或敢侮予聖人歎爲知道治國家者當永爲鑑而獸言蓋闕何哉昔者齊宣王大起苑囿廣袤方四十里芻蕘茂焉雉兔萃焉麒麟虎豹狙公狐狸之屬雜遯乎其中習伯騶公治葛盧之技者聞有山經未載之奇文咸往聽焉恍聞虎豹言曰險巖世心惟很莫敢爭吾之術專尙很日噬人爲事舉世所謂不忍之心掃除而漸滅之有畏我者則變我犇爲犬羊犇庶幾人不我覺食人盡其族而人莫知我惡狙公言曰摩邊日月蔽遮乾坤惟戲爲能吾朝三暮四朝四暮三以質鼓是非博

雅之士探原窮始方以吾爲人類之首基吾鼻祖也誰不趨承崇拜我哉狐狸言曰吾同場竈焉用天禱吾之計始以媚終以蠱有不信我者多方以媚之自入我彀中幽草晝率篝火夜鳴變幻離奇靡測而目之真麒麟怒之曰咄嗟汝虎豹自恃其很益紛人之爭人各有機心實汝于陷阱汝僅能食同類且自食其子孫在昔商辛無道纛汝周公驅汝萬里外投有北有北不受尙安敢入朝市而橫吞俛庶耶汝狙公卑身而伏以候赦者東西跳梁中于機辟秦漢之交有沐汝而冠者坑卒脛聞名靡不逝徒喚奈何玩世股掌反而報汝知之乎汝狐狸居上世食委壑尸唐高宗時幾傾國祚由汝掩袖工譏焚惑主聽汝心較虎豹狙公爲毒厥罪實盈吾不屑與汝輩伍是以游于西狩之圃麟經纂成人獸肇分古禮有言國有鳥獸行則獮之今滄爲一人而獸獸而人仁義充塞率獸食人造化雖有愛物之仁而不能容汝于覆載之內草薶禽獮之禍靡有底誰作俑乎俄而雷霆震驚宙合清明來告者曰有大賢孟子至國境矣人獸幾希察於人倫矣違獸不違者發見其良心矣于是虎豹竄于林狙公喪其魂狐狸匿其形麟乃吐玉書煥乎炳乎紛乎綸乎以祖世界之文明識者曰此卽記所載猩猩能言屈子所問何獸能言之徵也治國家者當知道不遠人不可爲道而遠人

凡作遊戲之文必當寓忠厚勸懲之意此文要在起處與結處數語有國家者股鑑在茲茹經自記

香港孔道學院演講錄戊寅

朱聘三院長先生諸位教員先生雷蔭霖先生雷資南先生諸同學鄙人並無學問承雷先生介紹邀請演

講實屬慚愧且因限於時間加以方言隔閡須請雷賓南先生覆述祇能略講我國學術綱要及求學門徑望諸君鑒諒

諸君須知人生世上應負最大之責任不過彌補天地之缺憾故中庸經曰參贊天地之化育何謂參贊天地之化育自精神上言之人倫道德是也自物質上言之一切科學是也今欲興盛我中國必須求精神上之建設推廣到文化上之建設茲特分四大綱而言

一經學 前英國大使朱爾典告我國嚴幼陵先生謂中國決不至於亡讀寶書足矣嚴詢以何謂寶書曰中國之十三經而已夫外國人皆尊重我中國經典而近時我中國人不讀中國經書未免謬誤試問古今中外有自滅其本國之文化而其國能久存者乎固決知其必無有也十三經博大精深約言之當先讀孝經論語孟子大學中庸論孟學庸宋代稱爲四書人未有不孝弟而可以爲人者亦未有不孝不弟而可以辦事業治百姓者故孝經爲人生必讀之書論語要義在學仁政三字有淺有深當分析研究修己治人之道畢具於是孟子言政治學最精至痛切尤要者曰性善非謂閉門靜修也盡力於忠信孝弟禮讓廉恥善己之性乃可以善國性故告滕文公曰可以爲善國大學作於曾子中庸傳自子思大學注重在格物當通達人情物理世變道爲體而藝爲用內修歸於誠意中庸亦以至誠無息爲本蓋誠僞之界卽人心生死之別誠者人心之生理詐僞欺罔則其心死矣五經曰周易曰尙書曰詩經曰禮記曰春秋三傳以上諸經鄙人於詩經禮記左傳皆有分類讀本治左傳較易以軍事外交兩類爲要

二性理學 孔子言窮理盡性孟子言心之所同然者理也西人謂之哲學又謂之心理學皆不若孔孟言

性理可爲政治之根本宋代周子傳其學中間經二程子傳諸朱子至明代王陽明先生又特闢知行合一與致良知之學說清初有太倉陸桴亭先生平湖陸稼書先生儀封張孝先先生迨咸豐年間羅忠節公羅山曾文正公濂生左文襄公季高皆爲理學正宗蓋理學興盛則人正而國運昌隆也儀封張先生有正誼堂叢書餘姚黃梨洲先生有宋元學家明儒學案極爲詳備鄙人輯有性理救世書讀之亦可得門徑

三文學 凡考察國政者曰國情曰國力而要則在文化鄙人嘗有譬喻我中國經史子集各種學問猶箱中之寶也而文學則其鑰匙也倘文理不通卽無以開其鑰而得其祕讀史以四史史記前後漢書三國志南北史新

五代史爲要通鑑重在資治凡軍事外交地理均宜分類札記子部以老莊荀揚管墨爲必讀之書孫子十三篇如虛實行軍九地用間諸篇必深切熟玩而參以近今外國戰術此外諸子祇須涉獵集部昭明文選古藻瑰琦而欲求實用當讀唐宋八大家文其餘專集各就性之所近清代桐城姚姬傳先生選有古文辭類纂以爲文者天地之菁英陰陽剛柔之發其論最精審曾文正公選有經史百家雜鈔程度較高坊間有古文翼古文觀止頗便初學鄙人編輯有國文大義古人論文大義國文經緯貫通大義並宜熟讀

四品行 凡人讀書所以學爲人也若讀書而不修品行雖讀萬卷書何益周易師卦曰開國承家小人勿用泰否兩卦爲治亂樞機泰卦言治曰君子道長否卦言亂曰小人道長自古未有不明君子小人之辨而可以講學問者更未有不明君子小人之辨而可以行政治者何以謂之君子仁義忠信樂善不倦如虞舜之取人爲善子以上五每日作爲課程躬行實踐乃可以立人極而崇人道此品行之修於外者也商伊尹之訓曰天之生斯民也使先知覺後知使先覺覺後覺知覺爲人生靈性所發倘遲鈍隔膜事事落於人後豈

能自強故今日要在訓練國民知覺然欲國民知覺之靈警而不能使之善良則將流爲欺罔變詐故孟子又嘗曰人之所不慮而知者其良知也惟其善良斯能靈警而其究必歸於深沉鄙人常謂智勇二字爲國民要素生聚教訓臥薪嘗膽何等輪晦孟子贊之曰畏天者保其國此品行之修於內也邇來人道教育廢棄盡矣鄙人不揣固陋常以正人心救民命勉爲家訓校訓深望吾國青年從事修養動心以致其靈警忍性以致其深沉上之爲聖賢次之可爲英雄

曾文正云知人所不知知難振興中國企予望之
之英雄人不能謂之英雄

辭賀重宴鹿鳴文壬午

文治蔡先人餘蔭忝竊科第光緒八年壬午隨先大夫赴金陵省試卽幸獲售時年十八忽忽六十年屆重宴鹿鳴之期諸執友相與稱賀僉謂吾鄉惟王藻儒相國會邀此典禮後無聞焉爰舉以相况且集賢爲懸匾於明倫堂以表紀念嗟乎相國晚年雖失意然值康熙全盛之時閭閻康樂百姓雍熙行此禮宜也今科舉廢棄久矣鴻噉中野魚潛深淵極目數千里道殣相望於斯時而稱賀私心彌抱不安矣無以有一言爲知己告先大夫常訓文治曰凡一身一家無歷二三十年而不變者然變而衰落者居多惟有積善可以永久文治謹寶斯言兢兢惕厲茲者世變多故正爲善不可失之時機詩曰維桑與梓必恭敬止吾邑太倉素稱瘠苦之區自丁丑以來飛鳥以凶民居如燬父母凍餓兄弟妻子離散城區可見者如此推諸各鄉其苦更不知如何一邑如此推諸全省全國其苦更不知如何言念及此不禁悄然以悲潛焉以泣曷若移稱慶之舉爲任恤之方乎幸哉邑中有善士錢誦三諸君設立粥廠自庚辰冬迄辛巳壬午中無間斷其始回鄉飢民就食約五百人至今歲夏增至七百三十餘人文治忝與勸募之列惟勸募有時而細備時局不定則

今歲冬振之能辦與否尙在不可知之數區區此心日夜焦灼惟願我積善會諸同人相與匡扶一面分途募款集腋成裘一面選擇飢民中力能工作者爲鑄生計庶幾治本治標兩得其道功德之隆不較優於典禮乎昔韓文公送楊少尹序云楊侯始冠舉於其鄉歌鹿鳴而來也今之歸指其樹曰某樹吾先人之所種也某水某邱吾童子時所釣遊也鄉人莫不加敬誠子孫以楊侯不去其鄉爲法旨哉斯言文治去鄉且數十年矣回首故鄉滄桑幾易追維先人之訓兼懷諸知交愛我之誠縈繞於衷烏能自己用敢述先大夫善與人同之旨爲知己告夫吾鄉自陸陳江盛諸先生講明正學提倡宗風本爲積善之地今得諸君子充周善氣又得賢長官調護多方積茲善果擴而充之詎有涯涘在易保合太和至於各正性命在書平章百姓至於協和萬邦本一鄉之善廣之爲天下之善則吾太倉豈非善因所自叻哉企予望之矣

孫君煜峯五子字說甲中

及門江陰孫君煜峯屬代名其世系次序並屬爲其子五人名字說以寓訓誥之義余旣以壽恆齊萬保世滋大八字名其世系次序並爲其五子名字說曰古者二十而冠旣冠而字之成人之道也厥道維何在於正容體齊顏色順辭令旣字之後徧告於鄉大夫鄉先生及宗族朋友其尊重也如此煜峯長子先已名曰恆揚字曰伯弘次子名曰恆恂字曰仲毅三子名曰恆愷四子名曰恆忻五子名曰恆悌均未有序余按易恆卦彖傳曰觀其所恆而萬物之情可見恆之爲義大矣哉其大象傳曰君子以立不易方言操守必堅定也儼虛而爲盈約而爲泰則學問品行在有無之間難乎有恆可不懼哉揚者適周易胡乾夕惕之義省諸心者也恂者論語鄉黨篇恂如發諸貌者也禮記愷以強教之悌以悅安之兄弟怡怡而一家之忻合無

間可知矣三子宜字曰叔裕四子宜字曰季樂五子宜字曰定綱爰進諸子而教之曰諸子之名與字或取諸易或取諸詩或取諸禮與論語內外交修表裏如一也伯弘當以弘道爲宗旨論語人能弘道非道弘人而寬弘大量寓乎其中仲毅與伯弘壘篋協和曾子言士不可以不弘毅任重而道遠仁以爲己任而天下之善事當以一身任之叔裕季樂亦當因字思義裕者綽乎有裕之義中庸寬裕溫柔惟能寬處境乃有餘地孟子言三樂首在父母兄弟之間倫常日用無所愧怍斯爲真樂夫世道原於秩序而秩序茲於紀綱大學三綱領以止於至善爲極則知止而後有定綱目定而萬事理此定綱所緣取字也詩大雅卷阿篇曰有孝有德以引以翼愷悌君子四方爲則所以諄諄於愷悌者其大本實在於孝德天下未有能孝弟而一家不與盛者亦未有能孝弟而一鄉不感化者深望諸子取孝經熟讀之參考余所著孝經救世篇及曲禮內則中論孝諸節目熟讀之視於無形聽於無聲躬行實踐毋須臾或忘庶幾子孫繩繩靡有不承君子萬年永錫祚胤後福庸有涯涘乎諸子當遵守勿替矣

香草居題詞甲中

無錫同鄉蔣君東孚素性愛蘭以香草名其居介錢君孫庵來書徵文余維聖人繫周易同人之象曰同心之言其臭如蘭世所傳猗蘭操謂孔子自衛反魯過空谷見蕪蘭喟然援琴而歌之以爲蘭乃王者香何爲與衆草伍豈非賢者不逢時蒙世之溫護者與迨屈子作離騷經抒寫其忠愛之忱曰余既滋蘭之九畹兮又樹蕙之百畝其九畹則曰秋蘭兮青青綠葉兮紫莖又曰春蘭兮秋菊長無絕兮終古往昔聖賢何以皆愛蘭若是與盍蘭者善氣之所凝結而薰蒸也大戴禮記載曾子之言曰與善人居如入芝蘭之室久而不

聞其芳何者以其與之俱化也吾錫至善之鄉也惠錫二山香蘭不少東林氣節至今未衰皆善氣之所留貽綿延而非替也亞聖曰一鄉之善士斯友一鄉之善士一國之善士斯友一國之善士今蔣君篤好國香栽培嘉種至數百本郁芬芬且屬薰君芷泉張君石園諸君健秋諸名畫師繪諸丹青貽諸同志殆欲以一鄉之善氣推之於一國與殆欲綿東林之善氣而步武前賢與殆欲師宗聖與之俱化之意而以友輔仁與抑將溯先聖之琴操而寄遐心於空谷與方今世俗泥芬塵垢之氣多清潔之氣少莊周有言逃空虛者聞人足音蹙然而喜今余方避地滬濱聞香草居之名豈非難得之足音與兼葭秋水露結爲霜久矣讀易履霜堅冰之訓能無惕然然余方將訪白駒之嘉客賦黃鳥之言旋消正月之繁霜而洗銀河之兵氣質諸蔣君與錢君其亦睽然高望而興盍歸乎來之願與

任琪女士懸壺紀念訓辭乙酉

任琪女士在本校肄業時天性溫淑植品端謹爲余所企賞同學所推許民國三十一年畢業後研究醫學昕夕勤劬茲將出而問世藉資實驗余雜居今之世以行善爲第一要旨孟子以孳孳爲善爲舜之徒而行醫實行善之大端博施濟衆誠非易事而立人達人廣種福田決不可失也中庸云天地之大也人猶有所憾宋張子云爲天地立心爲生民立命何以殫人間之憾爲立心立命之根茲須於醫道驗之論語云見善如不及務望女士勉旃

孝純孫女大學畢業訓辭乙酉

我家自五世祖南軒公六世祖墨池公俱爲塾師戴劉河紀略傳至九世先考若欽公益注重教育嘗有訓

曰凡爲人師者積善在此造孽亦在此熟讀詩書注重孝弟積善者也怠棄放任誤人子弟造孽者也孝純孫女大學畢業將爲人師矣爰書此勸之

胡君春臺收藏先哲書畫題辭乙酉

春臺仁弟以所藏扇面三十柄書畫若干幅見歸皆名人手蹟也其中如曾文正公彭剛直公及先師左文襄公遺墨尤可寶貴此外有文治未及知其名者未始不自慙卑陋也春臺自述得之於劫火之餘人莫知珍藏春臺見之大喜爲裝潢成帙寶而度之昔賢精氣不磨其殆有鬼神呵護之靈歟嗟乎古人所傳三不朽曰立德立功立言夫立功當乘時會而立德立言則在我可以修養切磋而成如此冊所蒐羅皆不朽之君子也道德功業著作所垂昭昭在人耳目而如文治者閱歷世變六十年餘三者無一成就上無以報邦國下無以對師門展玩此卷不勝滄桑之感並面熟渥緒也謹題數言用志景仰春臺在二十餘年前助余建造南洋大學圖書館諳練多才體用兼備今復好收藏若此其近世之難能而可貴者歟

茹經堂文集五編目錄

卷三 經說類

學易入門錄 甲申

讀書經大綱 己卯

古本大學微言 癸未

茹經堂文集五編卷三

太倉唐文治蔚芝著

經說類

學易入門錄甲中

易有旁通卦乾卦文言傳所謂六爻發揮旁通情也如乾坤坎離頤大過等是也有反對卦如屯蒙需訟等是也分宮中有世卦一世變一爻至五世後爲本卦孟子所謂君子小人之澤五世而斬也有十二辟卦辟者主也復臨泰大壯夬姤遯否觀剝乾坤是也分宮中又有游魂歸魂卦如乾宮火地晉火天大有是也有互卦如泰卦去初上交中互歸妹卦故泰五爻言帝乙歸妹其明證也又有上下相易卦如天澤爲履澤天爲夫而履卦五爻言夫履貞厲其明證也

學易之法應先研究八卦意義熟讀乾坤兩卦本義中分宮取象歌及上下經卦名卦變歌均應熟讀學易宜先明易例當先讀余所撰讀易提綱（易微言較深緩讀）次讀消息大義中學易反身錄次讀消息諸卦則其餘義例自可逐漸領悟矣

學易當先知漢宋家法漢易以唐李鼎祚周易集解爲主內所載鄭荀虞三家說最要通志堂經解中以項平父先生周易玩辭吳草廬先生易纂言爲最玩辭通達義例纂言洞明源流也學海堂經解內各易學書惠氏定宇張氏皋文所著尤精宋易以程伊川先生易傳爲主而輔以朱子本義近儒任氏啓運周易洗心

姚氏配中周易學陳氏世鎔周易廓曹氏復禮堂集亦可得入門之法

宜聖有言五十學易可以無大過而繫辭傳則言聖人以此齋戒以神明其德六十四卦大象傳以字均反身內勘可見學易必當措諸躬行齋心寡過若徒事空談道聽塗說於身心毫無實益也

顧亭林先生謂讀易書二百餘種無有過於程傳者按繫辭傳言易有聖人之道四焉以言者尙其辭以動者尙其變以制器者尙其象以下筮者尙其占程氏傳尙辭者也而變與占均括其中朱子本義尙占者也尙象自繫辭傳作網罟作弧矢外今已失傳然隨在皆是在後學心領神會可也南宋時惟有程傳與楊誠齋易傳朱子本義盛行於世誠齋以史事說易遠紹于賈家法近此書不易得初學先讀程傳及本義足矣以陰陽之義言之陽爲君子陰爲小人然乾卦僅三畫坤卦則分六畫此世界之所以君子少而小人多上達下達學者不可不慎也然泰卦君子道長小人道消則小人皆化爲君子矣曷謂君子之道論語所謂懷德喻義是也曷謂小人之道論語所謂懷惡曰金喻利是也孟子曰舜與跖之分利與善之間故學易首以端心術爲本心術端而品行無不正矣

韓昌黎云易奇而法如伏羲畫八卦因而重之而文王繫之辭曰乾元亨利貞坤元亨等云云周公作爻辭言潛龍勿用履霜堅冰等云云可謂奇矣然其中變動不拘或言天道或言人事或言修己之方或言治人之道卦爻錯綜又各自有其法惟在以身體之而已

坤卦文言傳云積善之家必餘慶積不善之家必餘殃繫辭傳云善不積不足以成名惡不積不足以滅身晝元者善之長也元氣保於一心而後能流行於社會善氣保於一家而後能推行於邦國易者積善

之書也故學易者決以選善改過勉人行善爲惟一宗旨況在今日欲救心救身救家救國救世道在爲善而已

讀書經大綱己卯

秦火而後尙書罹厄最甚故讀尙書者宜先辨眞僞眞者漢伏生所傳今文尙書是也僞者東晉梅賾所傳古文尙書是也伏氏所傳共二十八篇梅氏所傳共五十八篇僞者如大禹謨等二十五篇梅氏并撰僞孔安國傳唐時列於學官學者莫辨共是非至宋朱子始疑其僞清代諸儒始釐別之讀者求之於字句神氣之間自可識其眞僞矣

揚子法言云虞夏書渾渾爾商書噩噩爾周書灑灑爾韓退之云上規姚姒渾渾無涯周語殷盤詰屈聳牙質本揚子之說學者讀書審察其文章之盛求其所謂渾渾噩噩灑灑者庶幾深造自得矣至梅氏書文法頗謹嚴其論政事亦有可採之處周書以周公召公所作最爲精要考史記所載先儒所述如牧誓金縢大誥多士無逸立政康誥梓材洛誥諸篇忠厚愷惻至誠感人靖一時之變亂垂八百年之丕基胥在於此至哉文乎至召公所作雖僅召誥一篇而敬畏天命兢兢保國罔敢失墜其言節性日邁當與詩卷阿篇俾爾彌爾性參讀爲後世性理學之祖余別有說

參考各書如清代閻百詩古文尙書疏證江良庭尙書集注音疏王西莊尙書後案孫淵如尙書今古文注疏而後案辨析今古文尤簡而醒目近代吳棻甫尙書故引史記文與本經互相參考更爲精當蓋司馬遷嘗從安國問故與伏生所傳今文家說殊途同歸也

古本大學微言癸未

將欲究天人之奧探性命之原竊經史之繁曠豈易事哉或失之鑿空或失之傳會或失之臆造此無裨於聖經而徒滋枝葉者也大學一書傳授源流於諸經中較爲繁雜有禮記注疏本有大程子二程子本有朱子章句本有王陽明先生興復古本有高景逸先生本有劉蕺山先生本綜而論之注疏本係小戴相傳之舊當爲聖門所流傳無所謂古本今本也朱子章句強分經傳後人多訾議之不知朱子之意不過紹二程之旨爲私家著述藏以待正厥後科舉皆奉爲金科玉律則朱子所不及料也陽明先生興復古本雖矣至高劉二家疑知止而后有定兩節爲格物知至傳文不知知止節承上文止於至善言物有本末物卽格物之物無可疑者陽明先生高弟王心齋先生昆首倡此義當時謂之外內格物明儒學案中詳載之允矣余常謂八條目以脩身爲本脩身以誠意爲本故誠意章直提誠意不必言欲正心先誠其意也而誠意之要以好惡爲綱維自如惡惡臭如好好色起正心章有所好樂忿懣則不得其正脩身章好而知其惡惡而知其美者天下鮮矣洽國章其所令反其所好而民不從平天下章惟仁人能愛人能惡人好人之所惡惡人之所好是謂拂人之性始終以好惡爲綫索而未用以義爲利不以利爲利作結實隱用周易利物和義之旨而明揭之曰仁者以財發身不仁者以身發財後人喜言發財自陷於不仁而沾沾猶以爲得計哀哉此大學一書所以爲今日救國之良藥也前數十年州庠里塾學生莫不讀大學講師循文講解無有能會通其旨者近則視爲迂言廢而不讀嗚呼大學爲聖功王道合一之書豈迂而無用哉余特發其微以曉來者如欲沿流溯源研究全體大用則有朱子章句與余所著大學大義及陽明學術發微中四大問題在

茹經堂五編目錄

卷四 贈序壽序類

贈繆生天行序 癸未

郭晉之先生九十壽序 壬午

周君止庵八十壽序 甲申

閔君之孝八十壽序 庚辰

榮君德生七十壽序 癸未

張君竹溪七十壽序 癸未

林君菽莊七十壽序 甲申

許君潤生七十壽序 甲申

金君宗城五十壽序 甲申

伯元宗兄五十壽序 癸未

紀雲宗弟六十壽序 甲申

胡母顧太夫人八十壽序 壬午

弟婦蔡太夫人七十壽序 乙酉

袁母楊太夫人七十壽序乙酉

茹經堂文集五編卷四

贈序壽序類

太倉唐文治蔚芝著

贈繆生天行序癸未

性情者修身立品之大原也人而無真性情則宇宙爲虛器人生爲虛事乾坤或幾乎息人類亦幾乎滅矣故善相士者最重性情而行詣學問次之余於己卯歲講學滬上孫生煜峯繆生天行等五六人合組聽講邇來余南陽寓廬受學孜孜屹屹鏗而不舍詩曰風雨如晦雞鳴不已其志其行洵足嘉許也癸未秋繆生將有遠行余特援古人贈言之例以勗之曰人之品視其性情而其德莫大於孝生以孝行著於家侍慈闈能善承顏色母夫人年高多病易怒而生巧變曲體罔有違忤每值一語排解母夫人輒爲霽顏夫人之行莫大於孝觀易象六十四卦相生而孝心油然而發書堯典首言克諧以孝詩既醉篇言孝子錫類禮記曲禮內則二篇詳言事親之道冬溫夏清昏定晨省祇敬杖履出入扶持問寒問煖視膳奉甘生可謂能知其意能踐其實者矣追溯文治中年值先母胡太夫人患肝疾抑鬱善怒文治每戚戚然若靡所底止如是者十餘年至今思之潸然生須知比時之行不正履食不甘味久之而吾親告痊實爲人生最幸事也又聞余去年患膀胱炎證生頗聞其險曰吾師得毋因講學劬勞而至是乎因泫然出涕嗟乎師弟之間感情懇至若此實近世之難能而罕覩者矣生故習經濟學會赴閩省主持省銀行於時金融紊亂萬目睽睽生於盤

根錯節之餘爬梳積垢因應咸宜以是見重於當道人咸服其才之諧練不知皆其眞性情有以固結而感化之也大學言修齊而後及於治平孟子言老吾老及人之老生今歲適當強仕之年膂力方剛有志四方度其抱負必有遠過尋常者惟知己者有以默喻之也生行矣其本此眞性情擴而充之以行於社會以達於國家俾人人親感壹家務爲孝行太和之氣洋溢寰區豈非吾道中之光榮乎生其勉之哉

郭晉之先生九十壽序壬午

余曩時讀桃花源記爲神往不置嘗歎淵明文章虛設之境抑何空明幽雅若是雖然君子之道以心不以境以神不以形所蘊蓄者在方寸之間耳古詩云小隱隱陵阿大隱隱朝市夫陵阿而懷朝市之心雖雅亦俗朝市而有陵阿之志雖俗亦雅也莊子曰樂全之謂得志曷嘗肥遯以鳴高哉壬午三月上巳蘭亭修禊之辰忻值晉之先生九秩懸弧之慶春融景明惠風和扇其文孫豫森君輩將謀稱觴以祝嘏先生以世變方殷堅不許於是豫森君浼朱君大可紹介來請爲壽言以光家乘余迺肅然起敬曰先生冲襟雅抱其有類於淵明歟按先生爲嶺東望族天性孝友有昆季四人洎屢經患難先生如魯靈光殿巋然特存蚤歲懋遷海上信義交孚遇事直言無隱衆皆推爲長者曰艾而後慨世俗甚囂塵上歎曰時會波靡古道日湮矣爰適歸湖陽銅鉢孟鄉栽花種竹課雨晴飄飄然有出世之概見者嘆羨非所謂懷陵阿之志者歟桃源繚遠溯河伊人于焉逍遙矣無何世變元黃戈鋌滿地不得已再遷滬上則復由陵阿而城市矣而家庭和樂秩秩雖離四代同堂含飴繞膝黃髮垂髫並怡然自得方寸間依然桃源境也奚必陵阿哉願先生所以致此福者則大有在蓋人之行莫大於積善而萬善之原首基於孝先生年登九秩可謂上壽矣夢帝九齡

徵諸古禮汾陽壽考家世豔稱而天保九如之頌岡陵山阜尤重者松柏之茂毋不爾承回憶先生哲嗣振鳴君善承親志當先生七秩晉五之年建造宗祠輪焉奐焉以妥以侑洵乎孝思之不匱也德配胡夫人繼配陳夫人均勤儉持家賢而有德綜計先生一本所推多至二十餘人文孫豫森君輩均恂恂有禮克昌厥宗而豫森君以學士經商在棉業界令聞卓著主持鴻章紡織染廠暨通成公司兼辦大新化學廠成績斐然舉可觀焉曾孫大棟年方弱冠專攻紡織好學篤行頭角崢嶸惟望善體先生之志績戎繩武樂善不倦則先生期頤之壽可操券而致矣謹挈百朋之酒用晉百歲之觴焉

周君止庵八十壽序甲申

粵維閩逢涪灘之歲余月吉日忻逢秋浦止庵周先生暨德配劉夫人八旬雙壽良辰鄉鄰僚友僉謀具耐酒以甘之筵筮簞以樂之先生曰止方今鴻噉于野魚潛于淵振濟方殷邊言壽乎爰有廣勸廣利廣豐公諸同人以先生爲棉業領袖來請爲文用彰懋德余與先生有相識之雅而與先生昆季爲壬辰春闈同年誼不獲辭爰揚權而陳之曰人生至樂無逾於家庭倫紀之間先生之尊人愷愷公歆歷仕途總制兩江勤政愛民風清弊絕至今葑屋茹檐口碑弗替先生往來隨宦潔養蘭陔業業陸陸實趨實視洵能紹述丕基揆揚世澤兼能擴而大之此其喬梓宏猷足爲鄉邦矜式者也先生隨宦津海關時親迎劉夫人於道署造舟爲梁丕顯其光祥女升堂六媼交賀鳴雞弋鴈將翔將翔迄今已屆花甲一周先生八十攬揆劉夫人齊眉燕喜此蓋西俗所謂金婚尤難得而可貴者先生自賦詩云不圖今白髮猶是昔紅妝窈窕瓊環星雲煥彩矧劉夫人敦詩達禮內則夙綢子婦榮區曾元梨棗芝蘭玉樹繞膝承歡此其闔門起化克享人間至

福者也先生慮狂瀾既倒不易挽回又勗設宏毅學舍造就多士菁莪棧樸追琢其章竹箭南金胥歸蠶墨
樞楠悉入網羅庶幾清流模範不使浸入頽波此又儲才致用出於大匠之門者也而余所以頌揚先生者
則更有在周易言進德修業推之爲崇德廣業極之爲盛德大業夫吾儒明體達用蘊之爲德行發之爲事
業而已蠱卦之上爻曰不事王侯高尚其事象傳謂其志可則遯卦之五爻曰嘉遯貞吉象傳謂之正志上
爻曰日昃無不利象傳謂之无所疑先生初官工部郎中改官直隸道員厥後洊升財政部長當是時枋政
者倚畀方隆迺帝制議起朝政紛靡先生毅然退隱不以身之察察受物之汶汶矧然不滓非所謂高尚其
事嘉遯正志肥遯而無所疑者歟由是退藏斂德專心壹志於實業蓋先生之心以爲方今競爭時代端賴
富強而富強之源必以實業爲根本寰球富國之策以棉鐵爲大宗故先生服官時卽注意於通商興工開
鑛煤礦爲東亞首屈之區先生倡議合併以厚集資源於是又有北京自來水公司唐山啓新洋灰公司天
津鐵工廠之設又勗辦官銀號爲北洋金融重心而北方水利失修農民守舊種棉者絕少先生於是廣興
棉業爲京津一帶倡勗錫邑楊藝芳藕芳諸先進先樹棉業基礎味雲翰西昆仲繼之先生與之協力同心
在錫邑勗設華新紗廠推及唐山衛輝青島等區利溥惠周各省聞風興起而後華北棉紗事業乃與南中
並驅爭先矣凡此諸端雲蒸霞蔚鶴峙龍躔先生以商救國裕國卽以興國其苦心孤詣固人所共見者也
方其入仕之初早懷興業之願然而考槃碩人棲遲衡泌白駒嘉客於焉逍遙不爲鳳羣而爲鴻潛閉門卻
堵罕與世通識者歎羨以爲神仙中人而民生之利弊商業之恢張未嘗不往來於胸中禮記儒行篇曰竟
申其志猶將不忘百姓之病先生可謂憂思特立者矣南山有臺之詩曰樂只君子邦家之光闕宮之詩曰

魯侯燕喜令妻壽母爰躋堂稱祝用申天保九如之頌預祝期頤百歲之徵焉

閔君之孝八十壽序庚辰

粵維歲躋庚辰建子之月十有四日忻逢之孝先生暨德配芮夫人八秩設說良辰哲嗣魯西剛侯兩君謀
諳鄉鄰戚友將具酎酒以甘之和絲竹以樂之於時春醲初熟祥風斯扇迺有執爵而晉頌者曰鑿維之孝
先生幼而聰穎長而徇齊讀書一目數行下而茹苦食貧不克具脩脯迺歎曰人生當世事親爲先陔蘭潔
養吾誦之矣爰舍儒業入市廛習貨殖懋遷有無夙夜匪懈以供菽水人咸謂閔氏有子矣芮夫人系出名
門爲當塗詩人廩膳生松濤公之遺腹女幼與之孝先生同塾讀書畢五經業明雅通達年二十一來預祥
女升堂六嫔交賀梁匪滄澗柔色以溫惟時之孝先生操業未閱夫人佐以女紅一門之內其樂融融夫修
齊之道在庸言庸行此豈不足爲世俗法乎於是又有執爵而晉頌者曰古者教子之道首重義方家世之
丕顯本支之懋隆胥賴子孫之繼繼繩繩不係乎弋取功名而在乎敦行孝悌此一家盛衰所由肇也之孝
先生綴督魯西剛侯綦嚴誦詩讀書有不洽熟者則以夏楚收其威夫人以慈愛爲宗旨聿顧聿復恩斯勤
斯裕班伏之高才植薛荀之令譽課讀篝燈寒暑罔輟恆誦小宛之詩夙興夜寐無忝所生諄諄告誡魯西
昆季用能秉椿萱之訓循禮義之規汎愛親仁恣慎弗懈古所稱章趙兄弟人之杞梓何多讓焉此豈不足
爲邦家光乎於是又有執爵而晉頌者曰易稱積善之家必餘慶書言吉人爲善惟日不足孟子亦言孳
孳爲善者舜之徒善氣之鬱蒸君子之澤也被其澤者漬以深飲其氣者默而化矣之孝先生富而好禮仁
以存心加以利物和義貞固幹事每值暴豪之強梗必有以鋤之胥吏之欺罔必有以懲之於是鄉里善良

熙熙皞皞如登春臺夫人敦菽藟之本根慕麥舟之高誼弟婦張氏青年守志松柏清操夫人慰問慰時加任恤至於里閭稱貸虛糜不辭婢媪言貧獨金賜惠雖至囊空如洗彌覺怡如晏如此豈不足揚望家之壺史備里乘之書祥乎余於是錫鈞致敬執爵而晉頌曰是數說者趨矣然吾聞徐幹中論之論壽曰有王澤之壽有聲聞之壽有行仁之壽今之孝先生與夫人之德蓋由行仁而得令聞者也五德以仁爲權輿而體仁以孝爲萌抵中庸言因材施教而篤大德必得其壽孝經言孝爲德本教所由生孝弟之至通於神明光於四海之孝先生承馬父之洪胄嗣子騫之德音平居衣不旻美食不飫甘晝以養親爲職志並贊助乃弟結稱頌禮以安親心兄弟既翁和樂且耽父母其順矣乎記曰視於無形聽於無聲之孝先生有焉於是鄉鄰稱頌然曰幸哉有子如此蓋不問於父母昆弟之言克紹其遠祖矣夫人式刑于化嫻內則文祇敬几履博堂上歡比年避地滬濱而歲時祭祀必返梓鄉蘋蘩躬采籩豆靜嘉洞洞乎敬愉愉乎忠詩天保篇頌南山之壽基於吉蠲孝享又曰如松柏之茂無不爾或承言子孫之善於承先也大雅既醉之六章曰孝子不匱永錫爾類其八章曰釐爾女士從以孫子鄭箋謂女而有士行者必生賢智子孫以隨之夫人有焉是以賢嗣繼起魯西爲文學士工詩文善音律揚拉風雅敦厚溫良剛侯爲法學士精法律障人權無偏無陂有倫有脊當世目爲二難人羨其金友玉昆後先濟美而不知之孝先生與夫人之教有以啓迪而薰陶之也蕤者之孝先生築室於蓮溪之南考槃在阿徜徉風月望見之者歎爲仙侶而邇時白頭伉儷舉案齊眉視履考祥康疆逢吉百歲期頤之慶更晉祝於無疆矣衆咸曰善哉爰序以紀之之孝先生與夫人聞之共皆適然進一觴乎

榮君德生七十壽序癸未

粵維閩逢涓灑之歲孟陬之月吉日忻逢德生榮先生暨淑配丁夫人七秩雙壽良辰蘇浙皖紗廠同業公會諸同人僉謀所以壽先生者來徵序於余竊維先生事業廣矣博矣然自有其本原在先生自幼天性純篤喜讀羣經尤以四書孝經爲萌概年十五乃兄宗敬先生介至滬上通順錢莊習業貫通書算年十九隨厥考熙泰公至粵任三水河口釐局總副會計職弱冠返蘇親迎丁夫人來歸五稔以內風塵僕僕惟錢業稅務整飭經營年二十六慨然曰丈夫貴自立依人非長策也遂決意自創事業於是與麪粉廠之設年二十九改組易名曰茂新年三十一又有振新紗廠之設福新麵粉廠之設年四十一又創設申新一廠於滬年四十四又創設申新三廠於錫年五十一兼辦常州紗廠年五十六歸併三新紗廠爲申新九廠規模益闊遠凡茲商業人第見其霞蔚雲蒸龍驤鶴峙而不知先生之心在以商救國裕國卽以興國不言而躬行者在澄思默慮中也其他關係於教育者如創立公益學校開闢梅園籌設大公圖書館復設豁然洞讀書處教思廣被關係於公益者有若建築梓鄉公路設百橋公司建寶界橋爲蘇省鉅觀又余掌南洋大學時先生捐鉅貲助成圖書館余爲鑄熙泰先生銅像永垂不朽而先生孝思永傳矣抑余更有進者先生自幼學賈於太倉篤嗜陸桴亭先生之學迨中年後披覽陸子遺書旦夕不釋然則先生之學在尙志居敬以立其本窮理盡性以攬其全天人貫徹體用兼賅尤爲人所難能余所欽仰先生者實在於此丁夫人慈祥愷悌勉勵儉勤哲嗣金友玉昆肩隨濟美後福正未有艾用特序而敷陳之爲工商家勸爲公益家勸爲教育家勸而卽爲道德家樹之樞型爰郵致蘇浙皖紗廠同業公會以爲躋堂慶祝之侑焉

張君竹溪七十壽序癸未

周易言立人道曰仁與義仁者生生之理也其爲道豈不大哉植物之生也大者有皖其實小者亦施於宇故易言碩果又言復見天地之心識者曰造化生生之理所寓所謂仁也是以桃杏松柏其實皆稱仁仁道充溢蒸爲善氣成爲佳果子孫食之一家善氣彌綸磅礴豈不麻哉癸未秋季初二日忻逢張君竹溪七秩晉六雙壽良辰哲嗣鉅榮等謀所以爲壽者君曰止此何時違言壽耶於是其四子鉅榮慤慤來徵文曰文足以壽世較諸一時稱慶其裨益爲尤大余按其事實爲之起敬曰若君者洵無愧仁人矣考君世系出南宋清河郡王明萬歷間王之裔孫自津沽始遷浦左遞傳若干世至彥博公業農樂善又傳至乃祖維熊公生六子厥考秋濤公行居三生二子長曰蓮溪次卽君也君幼時慷慨有大志受業於從兄棣華先生之門弱冠棄儒就賈初營業於滬江唐恆泰果肆忠信篤誠肆主深倚畀之擢升要職繼念碌碌依人終非長策爰與蓮溪君鳩資張肆於邑城曰恆和順貿梨販棗懋業日宏乃益恢擴於滬市列肆曰張恆茂曰祥茂曰同茂司馬遷有言長袖善舞多財善賈凡貨殖之方當就民生日用所需者爲之流通而曼義若君之接張果非所謂佳果者耶於是同志欽佩而歆羨之者爭欲合資以牟利曰永大曰順茂曰協茂皆能別樹一幟而隸屬於君者也惟君退然不自滿更欲本業之發達而鞏固爰高掌遠躋倡議斥貨購置民房首捐巨金同聲相應衆皆景從今日之時行堂大廈崔構崇宏爲同業公所會議平準咸萃於斯實皆君之力也然吾所心折於君者不徒在營業之擴充而在爲善之勇決蓋善氣之在天下細細蘊蘊有感必應川沙僻處鄉隅民貧地瘠清光緒之季邑人士始創立至元善堂規模未備民國三年君參預堂務自獨巨金維持常費

復與親友合資報領霍公塘坡地九十九畝城壕地七畝悉充善堂基產又捐千金添建育嬰所樓屋并捐地三畝以廣義塚又倡捐建純陽道院以宏施教君遂膺選董事而任總理舉凡濟貧養老恤養育嬰振災施醫助葬捨衣米諸端靡不坐言起行及時興辦嗚呼善氣之翔洽可謂廣且大矣且緩急人之所時有也典肆之設非以求利實以周急君與兄蓮溪君及地方殷富諸同志組織同泰號典舖於城區旋設支舖同順號於曹鎮寬其質期減其子金貧民受惠更非淺渺抑余聞漢延叔堅言仁人之於孝猶枝葉之有根本也凡仁者靡有不孝君仁德之宏施實茲於孝行之純篤民國初年君念舅氏昆季殉庚申難乃兄蓮溪君既喪舅氏後迫維厥考遺命於邑城北門外合建張陸兩姓宗祠顏曰同本堂左祀張氏右祀陸氏清河平原諸昆戚集歲時伏臘燕享旅酬復與蓮溪君合力捐撥田房置義莊闢宗族卹孤寡培子弟有司上其事於黎大總統褒頌性行淑均匾額邑乘播爲美談而君謙退不自居功也大易言聖人以神道設教蓋係省心寡過之旨南匯周浦有輔化壇上海有覽德軒咸以勸善爲宗旨與陸君竹坪諸同志所倡立也於是有橋會建造橋梁以利行旅民不病涉君解囊佐其成隆冬施米爲周恤窮黎莫大善舉故敝邑太倉設粥廠已歷三年君於上南川三邑鳩同志組織經濟會司年輪值十四載力行不怠捐金達十數萬孟子曰老吾老以及人之老幼吾幼以及人之幼壬午歲邑人陸君修鎔郭君承祖倡設兒童教養院癸未春又創立養老院君先後募集捐金又達數十萬老安少懷各得其所而君猶以爲未足也既於義莊附設鄉校復於南匯周浦與陸君竹坪合創養正小學端蒙養而正初基小子有造成人有德君實兼之初浦東僑居春申者未有同鄉會鄉人勢散力薄傳君佐術倡建浦東公所君首贊其成最近浦東同鄉會勸募公益慈善善

君奔走川滬間推誠勸募達十餘萬元其利於水運者則有大川公司購汽船廉船資長江一葦可渡此與蕙溪君及艾君文煜所組成者也其利於陸運者則有上川公司架鐵軌通蘊輪電曠風馳瞬息可達此與黃任之張伯初兩先生所創立者也餘如電燈碾米各廠凡民生日用所需者君靡不盡力倡導用董厥成大雅之詩曰泮奐爾游矣優游爾休矣君舊居湫隘晚年先後建餘慶堂恆德堂恆新堂藏脩息游於其間曰吾至是身心稍安泰矣餘慶堂者君本與從兄棣華先生合建迨經改造讓嫂氏居堂屋並念棣華先生乏嗣以孫男永吉爲之後其敦友愛崇師誼如此古語云天道無親常與善人甲寅之夏君與德配楊夫人率仲子根元並第三女順男乘舟赴戚氏喪會風狂舟覆子女皆遭滅頂惟君伉儷遇救得免由是君益堅爲善之志並稱述此事以勸人先儒言有義理之命有氣數之命夫氣數何嘗不本於常理耶平居孝友敦篤人無間言常訓其子若孫曰吾雖廁身閭閻然以義爲利勤儉自理不敢怠荒差幸溫飽常思濟衆利羣遇有善緣必盡力以赴之且吾創業之始幸得蕙溪先兄暨姪問梅內姪蔡潤身君之補助始克有今日惟望子孫守富而好義爲善最樂八字箴力行弗懈庶幾祖宗餘蔭綿延弗替汝輩其勉之哉德配蔡夫人繼周夫人楊夫人君以屢賦悼亡頗形戚戚迨朱夫人來歸撫前子女若己出一門之內井然秩然君色喜曰吾無內顧憂矣綜計先後生子五人女四人孫男七人孫女六人魯頌之詩曰俾昌而熾俾蕃而艾詎非孳孳爲善之報耶按古禮捧觴上壽並無定期余故縷述君積善之庶徵以爲期頤眉壽之左券云

林君菽莊七十壽序甲申

粵維閏逢滄灘之歲旱月十有八日忻逢福建菽莊林先生七秩攬揆良辰於時蒲曠新熟薰風維和跼跼

濟濟冠帶稱祝者羣萃一堂迺有獻頌者曰先生華系本出漳州其先德太僕公總制台澎爰宅於台功績所垂至今昭彰耳目先生海南貴冑擢秀披華旋因甲午之役地軸震盪不願隸外籍遂內渡之廈卜地鼓浪嶼家焉其氣節之清高奚愧通德之選乎又有獻頌者曰先生功業彪炳難更僕數在廈時創設自來水電燈築路各公司胥樂利於民生又以經融貴周轉則設銀行以灌輸之商情忌渙散則組商會以團結之至於菁莪樂育追琢其章學子莘莘均歸陶冶爰有師範學堂之設遷書紀績首重河渠班志宜猷特崇滯洳南清水患漂泊田廬先生特築二十里堤以保障之民慶來蘇口碑載道其勳業之穹隆非梓鄉之光寵乎更有獻頌者曰先生抗懷希古有志四方嘗羨司馬子長徧遊天下名山大川足以洗滌塵襟發擴胸臆遂於丙丁之際探江南名勝雜花生樹羣鷺亂飛不勝古今之慨焉燕趙多慷慨之士山林屠販涸跡市廛先生以爲必有懷奇而待用者乃驅車北上周爰咨諏伯樂願冀北之野而馬羣空矣既而周歷長城登臨山海關攬蹶形勝慨然曰秦政無道暴德弗久然夷夏大防未始不善也返道齊魯觀鄒嶧射孔子之遺風宛然在焉登泰山絕頂觀日所出風雲吞吐乾坤清淑之氣於是焉寄下視齊州如九點煙矣昔顧亭林先生曰有經天緯地之才而後可以登山臨水蓋自古具極大之胸襟者乃有極高之知識先生其庶幾廬山道畧旋之武昌道岳陽入長沙過衡陽誦范文正岳陽樓記文先憂後樂當引爲己任也世變元黃屢驚風鶴乃踰五嶺抵九龍稅駕香港恬養三年端回滬濱凡茲遊歷所經皆囊中之詩料說者謂閩北詞人古有三變閩南詩人今有三變非虛譽也若夫訪英倫之三島遊瑞士之清都海外通人交相倡和非藝林之佳話與余於是鈞鑄致敬進而言曰是數說者皆足以頌先生之壽余請更述先生之福先生歆歷仕途荷

慶邸之推崇貴顯至仕邸百僚師師奉爲圭臬蓋自余掌農工商部尙書後惟先生繼起得人也辛亥政變挂冠歸珂里廬所沾戀天保之詩曰天保定爾何福不除韓詩外傳謂仁義禮智信五性定於內而後山阜岡陵百祿適於外既醉之詩曰君子萬年介爾景福威儀攸攝籩豆靜嘉釐爾女士從以孫子先生德配龔夫人毘陵洪胄雅善詩文卓犖天才縹緗唱和雖鴛鴦戩翼而詩卷長留哲嗣剛議君等金友玉昆後先濟美假樂之詩曰千祿百福子孫千億先生家庭之福媿於臺萊俾耆而艾俾熾而昌詎有涯涘竊謂此千祥之雲集俱係萬善之休徵方今鴻噉於野魚潛在淵瞻烏爰止于誰之屋宇宙之大人尤多憾正仁人君子爲善大好時機孟子言孳孳爲善舜之徒先生比時息影名園翛然物外見者以爲神仙中人而不知其胞與之忱煦育萬彙居恆嘉獎善人引掖後進嘗於菽莊園內創設吟社聘余鄉闈同年閩省宿儒陳石遺老人爲社長品題甲乙課最者仿從前書院例優給膏火譽髦斯士沾溉藝林壇坫主盟傳誦弗替香山洛社不能專美於前至於博施濟衆軫恤民艱時往來於懷而不能舍也他日期頤之慶庸有艾乎於是稱祝者咸曰懋哉懋哉余服官農工商部時聞侯王君大貞字幹丞屢爲余道先生德行中心藏之道阻且右適會先生孫壻李君克芽字清濂來徵文爰詮次其說蓋徐幹所謂行仁之壽於斯可徵稱彼兕觥先生其亦適然以喜忻然以酌乎

許君潤生七十壽序甲申

乾坤之所以常存人心之所以不泯者家庭孝道而已矣孝經曰孝者天之經地之義民之行教之所由生後儒以孝爲百善之原蓋孝者推恩之本人心世道之大原孟子所謂良知良能擴而充之可以保四海者

也推孝道以行善斯善氣扶輿薄彌綸周浹於宇宙之間而民生各得其所余不敏嘗著孝經救世編救世者所以壽世也惟孝迺可以致壽故中庸稱虞舜大孝即言大德必得其壽保佑命之理無或爽余嘗感斯旨以望人久矣歲躔甲申中秋展團圓之日忻逢壽縣潤生許先生暨德配蔣夫人七秩雙壽良辰於是戚鄰及同業諸同人將具筵資醴酒極軒囂之樂先生曰止方今鴻嗷徧野魚潛在淵鐵鳥飛音鷺還不測方矜恤之不暇遑言壽乎於是諸同人僉曰先生之心仁矣先生之言善矣惟七旬杖國世稱古稀且保人瑞不可無文字以紀其盛爰浼袁君容舫紹介來請作序言余按其事略作而嘆曰此所謂孝思不匱錫類以爲善者也豈非有功於人心世道者哉先生系出皖省壽春地靈人傑文德武功彰彰在人耳目然先生雖生長淮軍鄉而佩服儒素澹薄明志不染豪放佻浮習邑中長老咸以大器目之少年發憤下帷習舉業以第一人入泮應江南鄉試磨礪以須旋得家報言太夫人病距入關僅二三日耳先生急遽馳歸侍奉湯藥剗臂和藥以進目不交睫者數月且疏於邑廟神明願減己齡益母壽其至誠惻怛如此中年感世變日亟爰與同學柏烈武諸先生入武備學校肄業殫精竭思力求振奮既又共謀東渡行有日矣忽得家報以父病促歸先生撫膺太息自念人生遭際自有天命大丈夫欲有爲於世而不能盡孝於親何以對本心之良知乎迺星夜遄返以盡侍膳問安之職其有益於人心世道爲何如昔孟子言人少則慕父母仕則慕君不得於君則熱中世俗滔滔爲子弟者皆以功名富貴爲重至於恩勤願復之大德或且淡焉漠焉不甚眷念而先生視進取如脫屣壹心惟以親病爲重精誠之至金石爲開昔曾子有言人生百年之中有疾病焉有老幼焉君子思其不可復者而先施焉又曰往而不反者年也孝有不及可不深長思耶先生蓋無愧聖

門之訓矣自古稱不朽者有三曰立德曰立功曰立言先生孝德既若是之純粹矣而其佐柏烈武時嘗條陳經國治軍理民政策都凡數千言洋洋灑灑切中肯綮柏氏知先生不肯就名位禮以上賓蓋先生有感於宦海浮沈無裨實際用是自甘肥遁研究地方自治雖暫任邑宰僅數月即解組歸易曰高尚其事志可則也禮曰適弗逢世猶不忘百姓之病先生有焉先生隱退後精研法律遂爲律師然必以積善爲宗旨遇疑獄輒爲平反常慨離輕合則夫婦之道苦爭產爭財則兄弟之恩薄故於倫常乖戾之案輒摺不受理其有功於人心世道復何如道就養瀛濱遜志藏修儻然自得榜其書室曰知不足軒蓋取禮經學然後知不足之義室中羅列四部書縹緗什襲嘯詠其中發爲文章得周秦兩漢及唐宋八大家義法常慨人心世道滔滔日下爰哀集古人謨訓輯爲一編名曰嘉言類纂計分十目曰治生修省攝生教養處世治家器識閑逸曠達概論與余昔年所撰人格一書不謀而合近之可以修一身遠之可以傳百世諸同人請於先生爲梓而行之凡百學子皆可奉爲圭臬晷歟休哉蓋壽世之寶筏也其有益於人心世道更何如抑余有進焉者先生道德文章實根莖於先德仁齋公之訓嘗詔哲嗣曉初君曰存心須厚處世毋欺見義勇爲當仁不讓人格必須保存居家宜守勤儉此乃祖考之彝訓汝曹宜聽聽毋忘用是邦人欽佩私諱惠莊段執政特頒鄉國垂型匾額一時以爲光榮可不仰體而服膺之乎善夫先生之訓可與崑山朱柏廬先生家訓並傳不朽矣小雅小宛之詩曰明發不寐有懷二人言承先也又曰教誨爾子式穀似之言啓後也先生承先啓後各極其至凡屬士林舉當矜式其有益於人心世道更復何如德配蔣夫人德協瓊瑣儀昭翟蕩型家以儉御下以勤旣醉之詩曰蓋爾女士從以孫子鄭箋謂女而有士行者宜有賢智子孫以隨之是以一門

之內蔚爲旆微曉初君幼承庭訓肯構肯堂駿業揆張鴻規大啓凡金融工商諸企業領袖羣英當代靡不瞻望其丰采魯頌之詩曰俾爾昌而熾俾爾壽而威其所以壽家壽國壽世者詎有涯涘乎余迺敘而書之以爲人心世道勸

金君宗城五十壽序甲申

凡吾人之所以自勵與所以交友之道曰清曰慎曰勤能兼有此三者爲之萌砥然後能實事求是而應世有方余曩者服官農工商部時常以此指自勵並以之勗勉商人歲躋甲申某月日忻逢浙江鎮海宗城金先生五秩雙壽良辰余及門孫君煜峯爲先生執友慇懃懇款來徵序於余煜峯之言曰生與金先生締交有年始見其人望之藹然卽之溫然心知其爲君子人也旋與之交言而有信見善勇爲一經然諾靡不殫精竭慮盡力以赴之始終罔懈蓋實近世之難能而可貴者請先生一言以增光寵余按其事實欣然曰是無愧清慎勤三者之德爰撮其平生爲之序曰先生籍隸鎮海始居寧波鎮北三七房地僻而境幽與農夫處與漁人遊其所以異於鄉人幾希矣然而寬閒之野間氣所鍾扶輿磅礴知必有賢且能者出於其間此造物自然之理也尊人曰蓮福幼年習商弱冠時毅然走臺灣思得一當以自效無所得浩然以歸就金業服買生子頗衆宗城先生居長餘均戩翼周易所謂碩果也先生幼善病幸祖慈及重闈煦嫗嘔味維持調護賴以長成年十二來上海入金業小學肄業是校本爲職業教育性質有簿記匯兌等科先生因性之所近盡心攻讀樂此不倦宣統三年畢業校師及同學均欽譽之年十八入江蘇銀行練習是爲服務銀行之發軔先生嘗以清慎勤自勗同事者皆佩其行當軸如陳光甫潘季儒諸先生靡不嘉許之卽升任會計員

當是時光甫先生高掌遠矚淹貫經濟事宜創辦上海商業儲蓄銀行擬調先生入上海行而江蘇行持不可光甫先生請之堅越三載始得就上海行事務先生初充保管部主任嗣升副會計旋又充國外匯兌部會計主任且夫吾國自十九世紀以來留心時務者莫不以商戰爲急而商戰之要尤在諳練商情聯絡外交而後能綜其綱維定其方略非身入其中不能窺其奧窔先生適於民國十一年冬受上海銀行遣派得赴美國歐芬銀行實習越三載學成回國升任國外匯兌部襄理又改任檢查部襄理先生至是克展經猷然對於職務兢兢業業凡商業中請檢查者絕不以私情妨公義清慎勤之德更足以矜式羣倫矣抑凡經營商業者其本在講求商業道德而其用在聯絡商界感情先生服務社會素懷宏願通工易事遇顧客之洽熟者罔不予以便利代爲策畫是以商場交友趨之若鶩而先生肩任董事監察者計有成豐紗管廠公勤織廠等八處旋又被選爲上海銀行董事兼營業部經理又選任公共租界工部局華籍地產委員寧波同鄉會理事民國三十年孟秋遊歷香港歸鑒於漏卮日溢爰鳩合同志創設五洲銀行以爲金融蒼萃之區自任董事長三載有餘閱規日啓繼自今先生肩任董事監察者又有新新公司華通電氣公司等十二處凡商家之受益者難更僕數此外慈善事業請其任理事董事董事長者靡不慨然許諾切實敷施功德尤大然先生深自斂抑不尙鋪張居恆黎明即起律已治家俱有法度待人接物鑑空衡平既不因之負累人亦莫之能欺也德配陳夫人德協珩璜深資內助長君如新服務保險業次君又新勤劬好學金玉昆後先濟美俾昌而熒倬壽而臧介祉蕃正未有艾而余更望先生積善餘慶草草不倦有以綿斯福於无疆也謹綴蕪辭以爲躋堂之祝云

伯元宗兄五十壽序發末

天地和厚之氣鍾於一國則爲元氣之所萃鍾於一家則爲溫柔敦厚之誼雍雍熙熙子孫食德飲和亦無有軼乎範圍之外者若宗兄伯元暨德配劉夫人庶幾得之余於丁丑歲避兵長沙湘鄉繞道桂林歷香港歸上海於時道路未靖僦屋而居爰訪伯兄於西摩路之南陽路伯兄慨然賃屋數間俾余夫婦棲止盛意可感自是晨夕與共見其家之樸實儉勤無與倫比而其哲嗣熙治榮治亦均恪守矩矱洵難能而可貴熙治適於今春抱子伯兄伉儷含飴弄孫其樂無極彌令人歆羨也天地之大德曰生其功用曰和故中庸曰和也者天下之達道周易六十四卦歸於既濟定和順於道德而已家人卦之爻辭曰富家大吉家庭聚順惟在善氣之充塞而善氣之所擬要在和氣之交孚故論語曰和爲貴也抑余更有爲伯兄勉者蓋財政國家之命脈而銀行尤財政之樞機譬諸一身然血脈流通則身體健康而無所窒滯伯兄主持上海交通銀行出其羨餘流通於閩閩之間引鎡輕重無偏無頗大者高掌遠躡小者酌盈劑虛庶幾乎和氣之流行尤在金融之轉運宙合間財政家皆當退然歛手推爲巨擘他日者名聞列國綱紀四方豈不庶哉敢以此爲伯兄頌卽以此爲伯兄伉儷壽焉

紀雲宗弟六十壽序甲申

歲躡甲申某月某日忻逢紀雲宗弟暨弟婦余夫人六旬雙壽良辰哲嗣熊源鑫源森源奎源將謀所以爲壽者紀雲弟曰止今茲百姓顛連無所底止方拯救之不暇吾其敢言壽乎於是熊源等將以文字作紀念來問序於余余曰善哉夫文章壽世不愈於酒醴笙簧之雜選乎且紀雲弟善人也天地之大人猶有懃懃

賴有善人以補苴之文治藝者嘗序先德子良公積善傳家記載諸譜牒昭示來茲紀雲弟實能繼志述事勿替引之請詳述之以諭當世宜聖言繼善成性而於爲邦卽戎皆歸諸善人至於論善人之道則曰不踐迹亦不入於室踐迹者由格致誠正以達於修齊治平皆止於至善也子思子言至誠必先明善其上者不勉而中次者擇善固執而學問思辨行五者皆基於是孟子論羣羣爲善稱爲舜徒樂善不倦躋於天爵善之爲功大矣哉昔子良公之積善在建宗祠表忠節立義莊設學堂旁逮修橋築路靡不爲而其德行之最大者則在周濟隱貧每屆歲杪輒訪飢餓不能舉火者叩其門給錢若干或訝其無因至前則曰吾昔貨君錢君殆忘之耶或敝其出門訪其家屬乘烹茶款待時置錢几下卽匆匆去人皆未之覺久始稍稍知之故其積善餘慶流衍數世夫事莫大於爲善至爲善而深隱其名不使人傳播則尤人間世絕無而僅有者方今之世閭閻之顛踣困苦何如也詩曰鴻雁于飛集于中澤又曰瞻烏爰止于誰之屋文治每讀之未嘗不怆然心動謂係行善絕好機會今紀雲弟仰承先人遺訓往往當仁不讓見義勇爲立人達人孜孜不倦二十九年歲歎兵荒茆穡菽屋粒食維艱弟乃偕溥仁慈善會諸君舉辦平糶又因持久不易爰偕諸同志協力同心相與維持迄今已逾四載又任無錫孤兒院院長教養兼資又補助溥仁醫院施診給藥歲以爲常又任輔仁中學校董勸辦需費極鉅佛時仔肩成人有德小子有造菁菁者莪育才尤衆興辦實業高掌遠矚翁受敷施與保謙二弟暨蔡君絨三勸辦九豐麵粉公司於邑之蓉湖莊又勸辦慶豐紡織漂染整理公司於周山浜又勸辦協新毛紡織染公司於邑之五河浜擴充利源灌輸達於各省然而退然斂抑不自居功此皆善因善果根於善心者也余夫人忠厚慈祥治家有法訓子有方易家人卦所謂中饋貞吉洵無

間然又徵之詩曰宜爾子孫振振兮又曰俾爾昌而熒俾爾壽而臧敬爲紀雲弟伉儷祝且爲熊源昆季勉焉

胡母顧太夫人八十壽序壬午

粵維元默敦牂之歲如月圓闔吉日忻逢胡母顧太夫人設帨良辰哲嗣企霞粹士將設醴醪以侑之張管絃以樂之太夫人以時事多艱堅不許於是企霞昆季來請曰吾母懿行先生所稔知也茲奉慈命未敢鋪張敢請一言爲壽其可乎余肅然起敬曰太夫人之德仁人之德也太夫人之心仁人之心也余與粹士有一日之雅謹就所聞用彰闔史之光太夫人姓顧氏爲吾婁顧賈田先生長女系出名門幼嫻姆訓端婉聽從服勞恭儉年十九來嬪安定伯衡先生祥女升堂六嫻交賀時先生攻舉子業工書法擅詩詞夙夜劬學不怠著有嘯屏吟稿藝林傳誦太夫人相夫以禮治家以勤其事椿萱也棗栗榛脯融融洩洩脂膏以潤滲瀰以甘樂其心不違其志鄉里稱頌然曰幸胡氏有賢婦也迺自戊子至乙未運際屯連椿庭棄養加以鴛梁戢翼鸞鏡銷沈太夫人茹苦含辛上慰萱堂下撫孤弱不幸庚子歲繼姑又沒太夫人仔肩益重蘋蘩錡釜阻勉有無十數年中營喪葬者六治婚嫁者四綢繆闢戶攸躋攸芋人第見殖殖其庭漸臻輪奐不知其經營屢畫稱貸以益之者心力已交瘁矣居恆強記憶精計學竹頭木屑朝蠶暮鹽以慎以勤聿精聿潔比年以來科學勃興新猷煥發太夫人以爲風氣所開不宜自封故步爰命企霞粹士同赴滬濱就學揮節所入移充學金逾年企霞歸省服務梓桑而粹士遂進南洋公學當是時余承乏南洋校長一見粹士深器之亟遣派赴美留學而齊斧不繼太夫人以爲時機難得多方羅掘以濟粹士念慈闈屬望綦殷益自策勵精

進無疆丙辰得碩士返國奮鵬翮展駿圖太夫人色然喜惟戒弗隨流俗入仕途粹士乃就母校職任電機院長易言苦節又言甘節太夫人蔗境彌甘週年就養春申婆娑風月安車莅止旋返沙溪見者歎羨爲神仙中人非企霞粹士先意承志曷克臻此余嘗謂爲父母者享壽久長全恃乎人子之侍奉能得其道蓋太和元氣之所充周也昔孟子以草莽爲善爲舜徒又以樂善不倦爲天爵居今之世正爲善之良機也而萬善根源萃滋于孝大雅既醉之詩曰孝子不匱永錫爾類蓋爾女士從以孫子鄭箋謂女而有士行者必生賢智子孫以隨之而魯頌閟宮之詩頌壽母曰既多受祉黃髮兒齒今太夫人之賢德可謂女而有士行矣宜乎天保定爾亦孔之固受祉之多惟日不足是以子孫繩繩輓於麟趾孫敬修敬侃均在大學畢業遊學歐美回國後均任顯職以下曾孫繞膝奉匝奉榮怡怡色養太夫人願而樂之百歲期願定可操券而致茲值祝嘏稱觴賓朋賒濟爰揚權陳之望卽書諸北堂用伸九如之頌云

弟婦蔡太夫人七十壽序乙酉

歲聽乙酉三月忻逢弟婦蔡太夫人七秩壽辰哲嗣淞源將合鄉鄰戚友略具酒醴笙簧以博萊舞之歡太夫人曰止今茲何時吾方恤穉之不暇詎可鋪張稱慶耶於是淞源兢兢遵母命謀徵文字以娛之來問序於余余不禁肅然曰此善人之用心也古來閨閣中之懿行曰仁曰孝曰節曰仁非徒惻隱而已凡善行當徵諸實節非徒貞操而已凡儉德俱括其中漢書載延叔堅仁人之於孝猶手足之有腹心枝葉之有根本也故凡百善行皆以孝德爲基礎余夙聞我申伯五弟婦之賢德懿行爰謹志而序之用爲家乘光且俾淞源藉作北堂之慶按我錫邑唐氏純孝樂善之風實肇基於先伯子良公其隱行善事更僕未易數先兄鄂鄰

昆仲善繼善述每逢各地或本省歲早凶荒輒繞室旁皇甚至相與對泣誓必拯救生活之而後快然而所以拯救之者實皆賴太夫人之勤儉持家節衣縮食有以成其大善之志而擴其至善之行也太夫人系出錫邑名門蔡氏祖晉康公祖妣丁太淑人治家以嚴肅稱考儀庭公妣楊太淑人慈祥愷悌秩然有條理兄文鑫字兼三時人推爲善士太夫人孝德根荄於天性恪稟曲禮內則之訓視無形聽無聲定省溫清靡不悉中於禮戊戌歲來歸我五弟申伯君壹以事父母者事舅姑榮區滄澹柔色以溫 and 妯娌睦族鄰衆口交譽以爲我唐氏幸得賢婦也平居氣度寬宏吉祥止止從無疾言遽色深恐不適堂上之意小戴禮記言事親之道樂其心不違其志又言有深愛者必有和氣有和氣者必有愉色婉容太夫人深體斯旨皎潔潔養無有非儀其孝德如此居恆黎明即起謂一家皆能早起庶可保存朝氣彼晏起者皆怠惰之輩也布衣蔬食深屏浮華涖源見其過於淡泊稍以豐腴爲請則曰汝外曾祖母模範吾數十年服膺之矣昔時樸素家風尙復形諸夢寐豈可改易常度乎其儉德如此家非素封而好善不倦見人之急輒傾廩不辭艱隱不令人知申伯弟嘗有言曰凡行善事譬諸衣服宜作裏弗作表以作表必先做也余嘆爲知言太夫人躬體而力行之固徵申伯弟刑于之化益見太夫人慈惠之懷其仁德如此申伯弟晚年患目眚數載起居出入動須扶持太夫人委曲侍奉無形無聲之中俱能悉如其意丙子夏申伯弟又患腸瘡證輾轉牀第歷十閱月中伯弟眞冷時執涖源手而唏噓曰吾病經寒暑汝母勞瘁已極古來賢婦無適於此矣汝必善事之涖源謹受親命壹舉足壹出言舉不敢忘親訓夙興夜寐孳孳爲善邇來時局元黃益盡力於救濟遐邇民生被其澤者孔多造物報施因果不爽蘭桂芳芬觥觥繞膝舍館弄孫一門融洩其歡樂有非尋常所能及者魯

頌之詩曰魯侯燕喜令妻壽母又譬諸徂徠之松新甫之柏太夫人近世之松柏也古語有之切人不媚余向不爲諛辭檢和太夫人之賢敬掇其梗概序述如右藉爲太夫人期頤之祝並頌涇源爾昌爾熾罔有既極云

袁母楊太夫人七十壽序乙酉

余嘗讀天保之詩曰天保定爾亦孔之罔解之者曰保仁義禮智之善性貞固不渝其末章曰如南山之壽如松柏之茂解之者曰松柏有心前者未凋後者已繼喻子孫之盛振振公姓方興未艾故曰無不爾或承魯頌闕宮之詩曰俾爾昌而熾俾爾壽而臧斯二詩者可爲袁母楊太夫人頌焉歲次某某月某日爲太夫人七秩設輓良辰其文孫德昌與余及門翟生西華相友善介翟生來徵文余肅然起敬曰太夫人之節操歷四十餘年而不渝其教育文孫歷二十餘年始克成立以光大其門閭造物之報施豈非積久而彌彰者耶太夫人系出滬西望族幼讀內則心領神會躬行淑德靜婉柔嘉年三十有一來歸袁先生處莊爲繼室乃處莊先生邁厲疾太夫人焚香籲天流涕剖臂和藥以進而祿命已終先生竟不起四度瘡圓遽分鸞鏡太夫人慟絕既而自念曰袁氏一綫綿延職屬於我與其輕身而舍命不如撫孤而完家於是鞠育十齡孤子曰誦堯七齡孤子曰誦虞以養以教俾至成人誦堯任上海南市北區救火會主任與救火會評議等職誦虞精法律掌法政學院歷有年所迺氣數慘黷兩昆季不幸先後謝世太夫人既悲鴛鴦之戩翼又痛棗蓀之交摧沈痛鬱伊怒焉如擣旣又自念曰袁氏一綫綿延職屬於我其以撫孤子者撫孫乎於是恩斯勤斯教育諸孫德昌等迄於成立周易節卦象辭曰苦節其四爻曰安節五爻曰甘節由苦而安由安而甘

此天道人事報施之理有必然者如太夫人之節操詎不足以勵世俗哉而余所以重太夫人者尤在積善之久長夫善莫大於教養太夫人裕先幾之智數十年前即慨然於女學之不振亟須躬自提倡歷次捐貲贊助並分讓第宅於明德女中學減其價值規模寬敞校譽益隆居恆樂善好施凡閭里中耄老育嬰旁逮鰥寡孤獨廢疾者罔不加以振卹若夫各省水旱災沴及變故瘡痍太夫人遇有聞見輒惻然不安曰同胞之苦若是詎可不籌救濟之方耶爰慨解仁囊普施閭澤當道者上聞政府褒嘉頒給獎章人咸以爲榮而太夫人欲然如不及也平生心莊而行果氣和而色愉悃悃無華儉勤自飭織紉組紉澀澀不懈益敏有婢媪不能任者則爲之代勞而不厭怡然曰此吾分內事也待親朋壹以恩意有緩急來求者靡不虛陳以給遇有赤貧困苦者必扶服拯之不足則出環瑣衣服質值助之而不以告人其訓德昌輩也經商以治生力學以致用崇尚信義力戒誇躁以罔利常誦小宛之詩夙興夜寐無忝所生以勗之德昌格遵慈訓歷任義昌錢莊銀錢業聯誼會兒童保育會上海養兔場立達農場大同電工企業公司中國聲光公司弘毅中學醫學書局董事等職現任潤利錢莊華豐銀行副經理令聞令望遐邇交孚而其尤愜於重聞之意者在任救火會董事以誦堯君曾任此職德昌以鬻髻之年能繼志述事尤足培積善之根源也其蚤年曾創辦古今柬帖及語文等展覽會成績燦然亦足多焉佳婦蔣氏如玉大夏大學教育學士系出吳興爲清詒授中憲大夫江蘇卽補道丹秋先生曾孫女名門淑德賢孝徽音孫女佩英適交通大學工學士吳君鴻照修英美英在闈待字曾孫男三人四代同堂一門鼎盛太夫人願而樂之期頤之慶庸有既乎大雅既醉之詩曰釐爾女士從以孫子鄭箋謂女而有士行者必生賢智子孫以隨之豈不信哉太夫人聞之曰此非浮

飾之辭也當適然晉一觴焉

茹經堂文集五編目錄

卷五 序跋類

太倉先哲遺像冊序 辛巳

重印南通張君季直年譜序 壬午

松江交通志序 庚辰

盛杏蓀先生愚齋存彙序 己卯

嘉定錢氏宗譜序 壬午

上海荷溪金氏族譜序 甲申

曹君松喬手鈔四書集注序 己卯

粹芬閣四書讀本序 庚辰

馮君紫珊七旬紀念刊序 壬午

國學專修館十五周紀念刊序 丙子

高氏中學成績錄序 辛巳

當湖雪映廬畫鑑序 壬午

吹萬樓文集序 辛巳

江君武子本國歷史地圖序辛巳

李君惠農詩文集序壬午

錢君士青全集序壬午

葉君長青國魂集序丙子

王君次清詩詞集序癸未

聞孫蓉先生遺詩序甲申

錢君躬行詩存序甲申

唐氏孝友樂善圖序甲申

野航吟稿序甲申

陳君徵宇詩集序甲申

孫君緯成三十週從戎紀念序癸未

蕭屋泉先生師生畫展集序甲申

南郊送別圖序甲申

百蘭圖畫冊序甲申

復旦大學政治學系行政練習序乙酉

增訂古文觀止序癸未

元曆紀年法序乙酉

野園題詞序乙亥

明季忠節貳臣字蹟跋辛巳

明楊椒山先生手蹟跋癸未

石刻王陽明先生遺像跋壬午

繆文貞公會試遺墨跋甲申

婁東十老圖跋甲申

朱氏傳家樂善圖跋甲申

唐君穗卿遺像跋己卯

陳君幹丞林下課孫圖跋己卯

雙梧館秋課圖跋庚辰

錢君孫卿私乘跋癸未

茹經堂文集五編
卷五 目錄

茹經堂文集五編卷五

序跋類

太倉唐文治蔚芝著

太倉先哲遺像冊序辛巳

重光大荒落之歲如月及門凌生祖詒以書來告曰吾邑地處海濱夙爲禮讓之鄉自宋元迄今代有聞人志乘不絕書祖詒承乏本邑圖書館時兢兢焉以表揚前賢爲天職謹自宋代始歷元明迄清光宣時止蒐探先哲遺像裝繪裱製附以傳略預定百頁先拓印第一集問世夫攷典型而資矜式亦吾師之志也敢請一言以爲序文治聞之肅然動容曰凌生之願宏矣厥功偉矣語曰莫爲之前雖美弗彰莫爲之後雖美弗繼緬懷先正歷歷心目間文苑有弇州昆季開其宗而鹿樵子以詩史鳴復社嗣興天如南郭主盟壇坫性理有陸陳四先生闡其旨而願行人沈光祿以經學著畫理則王奉常大顯於世而蕙琴少司農續戎繩武平陽衛玉侍郎敬箴庶子科名鼎盛而婁東詩派興焉畢宮保經訓開堂幕府極一時之盛厥後若錢伯瑜中丞父子勲業丕著陸星農殿撰金石名家洎乎清季吾師陸文慎王文貞二公或以忠直諫諍顯或以高尚道學傳人才項背相望懿歟盛哉過吾鄉者嘖嘖稱羨以爲風俗純懿甲于全省然揆厥淵源蓋有所昉自陸陳江盛闡明理學躬膺道統之寄由是經正民興人知正學後之人訪淮雲寺舊址過蔚村七十二潭慨然想見諸老輩講學之風瞻慕流連不能自己而讀陸先生遺書與思辨錄陳先生遺集與治綱盛先生

形勝要略與夫斐水文徵斐東雜著諸書僉歎爲天人之奧經世之謨格致治平之原具備于斯後生小子高山景行其奮發刻勵砥柱中流之志當復何如昔子與氏曰奮乎百世之上百世之下聞者莫不興起然則披覽是冊者誦其詩讀其書不啻親炙其人矣而文治則更有進焉者先大夫竭畢生精力教授生徒孳孳焉豈以正風俗尊經術培人才爲宗旨恭覽是冊遺容宛在文治旣不勝蓼莪之痛而後代子孫迪惟前人光燦躋諸先進隨在皆入德之方又豈僅繼序不忘而已哉

重印南通張君季直年譜序壬午

當前清光緒中奕吾得執友二人焉一曰萍鄉文道希同年一曰南通張君季直蹤跡不甚密而神交俱攀道希同年于光緒十六年庚寅科以第二人及第君於光緒二十年甲午科以第一人及第當是時在朝執政若翁文恭若潘文勤諸公皆交口稱譽二君不啻若口出而在野士君子亦喁喁相望丰采爭得一見以爲榮乃爾時枋政者方共樹黨援分流別派遣希無端被謫行逐海上隱居求志而君則見幾而作浩然歸故鄉提倡實業遂成貨殖鉅子而其智識闊遠扶持國家尤足多焉壬午夏譜弟汪君仲虎以編輯道希詩文集來告余深喜之泊孟秋七月南通陳君葆初將重印君年譜屬爲序言葆初對於張君蓋再傳弟子也余維年譜之作其大者覘國運之盛衰世變之升降其次則師友淵源工業建樹與學問宗旨又其次則出處進退之節其他無關指者可弗錄也溯君南宮告捷之會正海波騰沸之時君夙裕讓猷日與翁文恭公謀定傾之策而比時吾輩懷雄健之志相與共挽時艱得當以報國乃一壞於戊戌之政變再壞於庚子之拳匪乘輿播遷名存實隕迨戊申歲兩宮晏駕而清社屋矣黍離麥秀之感銅駝荆棘之悲相與憑弔

於荒江寂寞之濱中心如噎詩有之誰生厲階至今爲梗又曰臯臯泚泚曾不知其玷俯仰數十年來慶興存亡之數未嘗不流涕長太息也余少時卽耳君名丙戌歲計偕公車始相識於友人座中厥後彼此以文藝相切劘壬辰余先捷禮闈甲午君登上第名滿京師後因不合時宜遠出國門音問疏闊泊余長農工商部時大生紗廠成效卓著而印刷漁業導准各公司次第成立余白於慶邸奏派君爲商部頭等顧問官並通知各省著爲矜式丙午余奉諱返里維時江蘇教育總會擬全省樞紐羣推余爲會長君爲之副先後四年每相晤商榷於學務商務恆有裨益時蘇州設地方自治籌備處君薦余爲總理並貽書曰自治若無正紳主持大危象也幸勿辭辛亥國變後余蟄伏海濱翰晦不出君招赴京余以親老目疾辭洪憲帝制興閩君侃侃力爭于項城之前曰我商人也以商業譬之極危險之投機一經挫跌破碎無餘地矣項城不聽君卽假歸余聞之擊節自後偶以郵筒相往還乃至丙寅歲八月君竟逝世矣傷哉禮儒行篇曰今世行之後世以爲楷身可危而志不可奪猶將不忘百姓之病其憂思有如此者今讀君年譜平生憂國憂鄉憂民一息尙存此志不懈可謂克完厥志矣抑更有進者人生不朽之故精神而已矣中庸至誠無息之義久而而徵者進於悠遠君之精神莫大於事業正賴後之人貞而固之擴而充之切望張氏子孫勉旃同鄉葆初諸君勉旃全國實業家勉旃庶幾君之精神永永弗替是余之所厚望也夫

松江交通志序庚辰

己卯秋余避難海上友人陸君規亮攜所纂松江交通志彙見厥案其目次曰地圖曰鐵路曰郵政曰電政曰航政曰航空曰道路橋梁最後附以感言井然秩然可謂有條不紊足以餉遺來者矣陸君之言曰松江

昔郡而今縣民國初年邑人建議修志未觀厥成二十五年李君志韓冷來長松邑復議修志及籌款均有難色規亮遂言桑梓之事與修志者皆應卻酬人各盡職庶其有濟沈思齊先生惟賢力贊成之議遂定於是分類任事繁簡有差規亮任交通一門閱數月纂成此稿千戈擾攘之際攜以自隨同人以是編如碩果之不食也爰印行之敢乞一言以爲序余聞其語大有感焉松江古吳越戰爭之地也昔越句踐臥薪嘗膽慮心積慮凡二十載生聚教訓遂以報吳當是時吳夫差軍於江北越句踐軍於江南句踐分兵三路乘夜涉江直擣中堅吳師大北其戰功載於國語及吳越春秋涉江者涉松江也間嘗驅車走吳越之郊過石湖蕩歷楓涇抵嘉善之嘉興慨然想見戰爭之蹟思式怒讎之精神比時越國上下一心雖婦人女子亦感慨興亡同仇敵愾興歌采芩盈耳洋洋迺知深沈養晦者固不與淺露驕張者靡不敗孟子深斥霸功而交隣有道有取於越句踐者何哉惟畏天者能保其國也前事之不忘後事之師吾敍松江交通志而知興國之有繇也

盛杏蓀先生愚齋存藁序己卯

歲次己卯余避兵海上毘陵盛澤承昆季攜其尊人杏蓀宮保奏議二十卷又電奏稿暨朋僚電稿八十卷都凡百卷屬余爲序余受而讀之慨然嘆曰嗚呼慶興存亡之故雖云人事之遷流豈非氣運使然哉伊古盛時百僚師師百工維時尙已泊乎後代君明相賢諫行言聽布政於外四方咸發民生熙皞享太平之福史策所載猶令人動歎羨之思迨我有清之季因循竄敗諫未嘗不欲行言未嘗不欲聽而羣吏怠官罔知振作坐致淪胥以敗吾觀近今六十年來事變之繇輒不禁痛哭流涕長太息也當同治中興時李文忠公

崛起繼曾文正公主持全局雖德不逮文正而才與相埒固嘗高掌遠躡欲躋中國於富強而左右贊襄之者厥惟盛公杏蓀當世論公政績者曰招商曰鐵路曰郵電而公實以學校作之根抵常與美國博士福開森武進何梅生兩君參考歐美學制銳志興建因時制宜爰於光緒二十二年有奏請籌設南洋公學及達成館疏二十七年有請設商務學堂疏其言曰廣商學以植其材聯商會以通其氣定商律以維商市方能特開商部以振起商戰擬於南洋公學旁購地建造商務學堂厥後南洋公學即改爲高等實業學校宜統三年有請籌辦商船學校疏其時文治方監督實業學校協議奏辦於吳淞於是規模闊遠矣光緒二十三年有籌辦蘆漢鐵路次第機宜疏是年十二月有籌辦粵漢鐵路疏二十四年有瀝陳南北鐵路辦理情形疏二十九年有奏辦滬寧鐵路疏三十三年有密陳蘇杭甬鐵路草約詳細情形疏其他若淞滬若萍醴若京綏各路等靡不殫精竭思次第規畫公嘗語余國家之有鐵路猶人身之有骨節脈絡貫通人迺無病其大要在通風氣相觀而善若夫師行糧食土貨運輸尤其次焉者也而余督南洋公學時即設土木建築科繼設管理鐵道科路務人才於是源源蔚起矣至於招商郵電銀行皆爲國家要政並散見於各奏中知公於開濬利源心思既竭也然此猶其犄尾焉爾甲午朝鮮之役創鉅痛深光緒二十二年公有條陳自強大計疏謂國非兵不強必有精兵然後可以應徵調則宜練兵兵非餉曷練必興商務然後可以擴利源則宜理財兵與財不得其人雖日言練日言理而終無可用之兵可恃之財則宜育才之數語者非強國之大本乎戊戌建嗣之命下朝野震駭滬商經元善等電奏力爭奉旨嚴譴賴公羽翼之得免於禍庚子拳匪爲亂糜爛不可收拾公與東南各疆臣聯約各保疆土於是有請發密詔平亂以挽危局之電奏請以團軍調出

禦敵以聶自成軍拱衛京師內外合謀藉圖補救且謂疆臣不敢顯言微臣幸以閒曹在滬受恩深重敢冒斧鉞云云其忠藎之誠可開金石迨鑿與西狩乃請嚴懲禍首締結商約保我主權進秩宮保殊恩隆典時人爲公榮而公方蹙然以爲憂三十年又有會同各疆臣密陳大計疏讜論嘉謨爲世欽重惜乎言者諄然聽者漠然如上所謂諫未嘗不欲行言未嘗不欲聽因循窳敗莫挽狂瀾公有言曰凡事固宜審慎然玩愒歲時至於審之無可審慎之無可慎則事機盡失雖有智者無以善其後嗚呼此志士仁人所爲疾首扼腕而莫可如何者也宣統初元公再出山則國事蜩螻沸蕪末由措手國變後公解組歸語余曰吾萬念俱灰惟實業善舉尙蘊蓄於懷耳蓋公平時見義勇爲各省偏災告急籌集官振義振不下數千萬鴻嗷安集有口皆碑迄晚年金陵兵災公尙集衆謀捐首出萬金以爲倡越兩載而公逝矣余之初識公也在光緒二十八年赴歐美遊歷時踰年余備員商部常與公函牘往還研究商政利弊共策進行三十二年文治丁先妣憂回籍公迎於滬上又親赴太倉弔奠慰唁周摯感情益不能去懷至今序公之書痛戈鋌之滿地哀禾黍於故宮世事茫茫中心如噎下泉之詩曰慨我寤歎念彼周京大東之詩曰瞻焉顧之潛焉出涕公地下有靈當不勝廢興存亡之恨矣

嘉定錢氏宗譜序壬午

人生百善之源孝而已矣孝者天之經地之義民之行至德要道之大本也六書之義學字從孝教字亦從孝故學者非孝無以爲學基教者非孝無以爲教本至矣哉孝德彌綸由一家一鄉而推諸一邑由一邑而推諸全國和氣充積刼運銷除孝經曰天下和平災害不生禍亂不作此之謂也追遠之道尊而譜牒興焉

余少以舉子遊京師應春明試卽聞嘉定同鄉錢宮詹竹汀先生名及長讀潛研堂集養新錄尤篤好之以爲此經學家正宗非碎義逃難者比也繼又廣求九錢先生書而讀之於文字學發明精博嘆止矣壬午孟秋錢君西園以宗譜序屬余考其源流發祥於少典始封於饒鏗肇姓於上士創國於武肅綿延數十禩支裔徧九州在嘉定者則有盛涇石岡兩大支派竹汀先生系出盛涇支而石岡夙以隱逸韜晦於鄉里顧石岡支宗譜一修於六世雲青先生再修於九世麓芸先生迄今歷九十餘年矣西園將續而成之洵所謂孝思不匱者與考石岡支自有明華川先生由海陵始遷嘉定卽遭乙酉之變行遊荒野墓王貞憲之爲人終身墊伏不出其氣節固復乎莫尙而其善氣所鍾尤在以孝弟之道倡導子孫如西園所述五世天衢先生昆季五人終身未嘗析產洎九世夢懷先生且夕泣血及葬築廬守墓一夕大風雨廬毀先生披苫子立泣而呼曰兒在此毋恐比天曉不絕聲此其孝行之篤足以感天地而泣鬼神矣於是邑之士大夫爲繪錢孝子廬墓圖相與爲詩歌以紀其事並載邑志中又如並世莘農諸先生亦以孝友稱其餘閩閩中歷代節烈貞孝揚芬志乘者更夥非善行之萃於閩族者乎余常謂孝弟明德也孝弟之道不絕於世則國民自無澆薄之行世道人心蒸蒸日上理可期矣豈細故哉孟子親親仁也敬長義也無他達之天下也良知良能盡人同具要在擴而充之足以保四海而有餘矣若夫文藝足稱者有如四世萬庚先生著有梅窗詩存西園之尊人有邨先生著有夢華居詩文集至十世芳圃先生十一世慶聲先生並以弈藝馳譽有蘇松太三郡國手之目夫弈小數也昔曾文正亦嘗究心於此良以布勢分合斷續遙應兵法寓焉余夙聞芳圃先生與陳子仙先生同時芳圃先生本爲四手經子仙指點一二遂成二手雖曰小道然不專心致志則

不得也余中年時亦喜弈爰特著之用申景仰云

上海荷溪金氏族譜序甲申

小戴禮記曰萬物本乎天人本乎祖又曰尊祖故敬宗敬宗故收族夫敬宗收族之道曷繫乎繫於宗祠宗譜兩大端宗祠卽古祖廟之制所以事乎其先而序昭穆序爵序齒序事旅酬之典悉寓其中踐位行禮敬尊愛親孝子仁人所以追補孝養之所不及宗譜者詳世系支派使子姓知本原所自而善善惡惡之義寓焉通才達議義烈節行智愚賢不肖皆系以傳略俾無遁情春秋享祀長老揚言於衆曰某也賢某也才某也有令譽宜獎飾之某也惡某也劣某也遊蕩而無業宜懲誡之則闔族莫不肅然而當時之言論室家之章史皆載於宗譜由宗譜而載於邑志由邑志之采擇而達於省志國史人心風俗之變遷於是焉寄此宗譜之大用如木之有萌砥泉之有根源也古者聚族而居故收族也易近代風俗之純厚者尙有某邨某邨之目然散處四方者亦復多矣至於疏遠之極慶不相賀喪不相弔駸至遠關不相識始也一人之身久而變爲途人此蘇明允作族譜引所以謂觀於宗譜孝弟之心可以油然而生是何也一點良知萬古不泯有以繼繼繩繩於無窮也歲躔甲申暮春上海金君名慶章字靜初獨焉齋族譜略屬及門項生鎮方爲介請序於余余曰此仁人孝子之心也考金氏系出吳之洞庭東山故老相傳有金葉席殿四巨族之稱上溯唐肅宗時有諱質者嘗平安史亂授節度使諱文襄宋紹興中有諱安節者官少保履躡南渡諱忠節又有大學士文剛公以清節著世爲名臣厥後自越入吳徙居莫蓋明季有諱文顯者避寇亂輾轉至滬之荷溪遂占滬籍歷三百餘年靜初其世孫也慨宗譜散佚詣東山訪同姓考譜系雖有文繫行次而未有文顯公

避亂遷滬明文不敢附從蓋慎之也不獲已謹以文顯公爲遷滬始祖別纂上海荷溪金氏族譜其純孝至誠可謂盛矣自世變多故士大夫於宗族之誼闕而不講祠宇廢爲蔓草譜牒等諸弁冕靜初獨兢兢於此且紹承先志增葺宗祠纂修族譜保守義莊義田並將擴而大之豈非仁人孝子之心近世所難能者與抑余更有進者當宋代鼎革時有金仁山先生諱履祥懷貞履潔隱居仁山之下追蹤濂洛性理之學泊然鮮與世通師事何子恭王會之兩先生後儒多宗之而金氏族譜未經載入豈其同姓不宗與顧靜初之淡泊明志品潔行廉無愧仁山先生且師事雲間理學名儒錢復初先生淵源有自夫理學者人心世道之大本也余嘗謂理學盛則國家興理學衰則國事替觀於清康熙間陸稼書張揚園諸先生可見又觀於咸豐間唐鏡海羅羅山曾滌笙諸先生更可見靜初守理學一脈之傳碩果不食復見天地之心他日必昌明而光大之仁山先生之遺緒遙遙三百年後得有傳人何幸如之願靜初益勉之可也

曹君松喬手鈔四書集注序己卯

年世家子蘇州曹君松喬儒門名族篤行之士己卯與余同避難滬濱以書來告曰吾輩不幸適弗逢世文
化淹蘊中心如噎竊願以不律更役之勤爲畱畱經訓之助按朱子四書集注都凡二十萬字有奇自今歲
中秋始日寫千餘字計來年春夏間終業願先生一言弁諸簡端余歎曰甚矣松喬之有心世道也夫四書
吾國之大寶也約其要義論語在仁政學三大端大學在繫矩公好惡不以身發財中庸在至誠無息彌天
地缺憾孟子在尊王道黜霸功崇孝弟辨心性朱子掇取菁華集諸先儒之說而爲注洵日月不刊之作漢
唐以來所未有也世之論道德者往往繫以舊字庸詎知千古有是非無新舊四書歷古而常新舊於何有

哉余掌學校願啓諸生常以讀四書集注爲羣經階梯而國人輒弁髦視之異哉夫救國必先救民而救民必先教心當以不嗜殺人爲唯一宗旨清初大儒睢州湯潛庵先生謂學者常以今人乍見孺子將入於井皆有怵惕惻隱之心二語懸諸心目間自可上達天德何哉天地之大德曰生也周易大義乾言大生坤言廣生傳言好生之德洽於民心孟子道性善性者生生之心天下之生久矣世未有不好生而惡殺者乃竟有嗜殺而惡生者墨子非攻篇云殺十人十死罪殺百人百死罪君子皆知不義今攻國則弗知非誠不知其不義也我貪伐勝之名及得之利故爲之計其所得反不如所喪者之多悲夫以天下之生生而供我好名好利之殘殺此論語所以歎慨想善人之卽戎勝殘夫殺而孟子於爭地爭城殺人盈城野特礪齒言之以爲善戰者服上刑痛乎哉聖謨洋洋而聽者藐藐也然則救國救民救世者讀四書而已矣讀朱子四書集注而已矣爲學爲政精熟於斯而已矣而國人輒弁髦視之異哉松喬當舉世泯斃之會獨以鈔寫聖經賢注爲先務之急豈非鄭百川而東之挽狂瀾於既倒者哉余故特嘉歎言之人心不死劫運且消邦人君子當不河漢斯言

粹芬閣四書讀本序庚辰

數十年前英公使朱邇典回國時福州嚴幾道先生流涕送之以中國之阡危也朱公使語之曰中國無慮危亡可慮者吾歐洲耳嚴訝而詢之朱曰中國有寶書發而讀之治平之基在是矣嚴詢何謂寶書朱曰四書五經是矣而四書爲尤要嗚呼外人之尊吾經籍若是而吾國忽焉不講非大惑不解者耶庚辰季秋沈知方先生哲嗣以粹芬閣四書讀本見際屬爲序言余受而讀之原書蓋知方先生主稿而蔣君伯潛佐成

之蔡君可圓爲之序書成適值知方先生花甲之辰可謂最高尙之紀念是編雖間雜語體然爲淺近易解起見其苦心可諒也其中索隱皆有獨得之處而分類一部尤能提綱挈領爰申其意而爲之序

論語一書爲道德之淵藪政治之綱領與夫修己治人之道悉備於此近今學子多有未讀論語者若不知分類研究之法何由得其門徑清阮文達嘗採取論語言仁各章別爲一篇余仿其例擬分十類曰學曰孝曰仁曰信曰政曰君子小人之辨曰六藝論曰教育立品準曰人心風俗鑑曰至聖救世不遇略史而學孝仁政爲尤要非孝無以爲學非仁無以行政比類讀之別其爲淺爲深爲精爲麤而研究之力行之用之則行舍之則藏可爲君子儒矣

或疑居今世而論古大學不免近于迂闊不知自古以來學制隨時變更而學道則萬世不易孟子論學校曰人倫明於上小民親於下明倫者明德之效小民親于下親民之效也爲三綱領分爲八條目格致誠正其本體也修齊治平其大用也古本大學列誠意章爲修身之本而誠意尤在謹好惡自如惡惡莫如好好色起其後正心章有所好樂有所忿懣修身章好而知其惡惡而知其美治國章其所令反其所好而民不從平天下章惟仁人能愛人能惡人反之而好人之所惡惡人之所好是謂拂人之性皆以好惡爲綱維而篇末則曰仁者以財發身不仁者以身發財此謂國不以利爲利以義爲利也又曰小人之使爲國家菑害並至嗚呼可畏哉治國者其悚之哉

中庸精義具於首章性命本源不在空談而在力行修養其大要有三曰涵養曰省察曰擴充滿養者戒愼恐懼寂然不動未發之時也省察者莫見乎隱莫見乎微慎獨之功未發將發之時也擴充者已發之驗致

中和之要天地之大人猶有所憾彌輪輔相之力也而下篇則歸結於至誠不誠則無物誠僞之界人心生死之判也誠故能成已成物而心日以純不誠則自用自專而心日以死余於自著中庸大義序中已明揭之又作中庸首章五辨以精研之中庸準周易而作經綸天下之大經其在斯乎

孟子生戰國之世目覩戰爭攻殺之慘慨然曰此所謂率土地而食人肉也今世一大戰國也吾輩志在救人非熟讀孟子之書闡發其學說不爲功余嘗分孟子爲十一類曰孝弟學曰尊孔學曰心性學曰政治學曰貴民學曰論戰學曰文辭學曰外交學曰雄辯學曰氣節學曰周易學人心滔滔於利安其危而利其竄故七篇之始首辨義利大聲疾呼以救之其篇末敘道統之傳而先之曰經正則庶民興庶民興斯無邪慝民生胥漸泯泯芴莽正氣一振則邪氣自消所以提倡而廓清之者非吾輩之責而誰責哉

余嘗有言救國先救民救民先救心而救心大要當訓練國民之知覺知覺宜清而不宜昏宜通而不宜滯宜先而不宜後若事事落於人後國之所存者幸矣孟子言良心言良知又引殷元聖之言曰先知覺後知先覺覺後覺靈警之謂也然惟知覺之善長者迺能靈警否則爲機變之巧矣論語季氏篇言生而知之在九思章前是知覺在思想之先矣中庸言生知安行學知利行是知覺在力行之先矣大學言致知格物鄭君解之曰知於善深則來善物知於惡深則來惡物朱子解之曰推及吾之知識欲其所知無不盡皆合外內之道者也明王陽明解之曰吾心之良知於事事物物正其不正以歸於正引孟子之說以釋大學所謂由善良而至於靈啓故今日欲求救心之法當以陽明爲主余嘗著陽明學術發微竊願學者讀之救心以救民救民以救國質諸邦人君子或不迂視吾言

馮君紫珊七旬紀念刊序壬午

宋歐陽子曰祭而豐不如養之薄斯言也蓋本于曾子所言椎牛而祭墓不如雞豚之逮存也仁人孝子誦斯語者莫不爲之流涕以爲追思于吾親既沒之後不若忠養於逮存之時斯言誠是也然逝而不可追者親也此爲人子者無可如何之事也以無可如何之事而補之以終身不忘之思此紀念之禮所由始也孝經曰孝子之事親也居致其敬養致其樂而終之曰春秋祭祀以時思之禮記祭義又申孝經之義曰壹舉足而不敢忘父母壹出言而不敢忘父母君子有終身之喪忌日之謂也忌日非紀念日乎古之君子終身慕父母如此生民之義備矣錫邑同鄉友人馮君雲初哀其尊人紫珊先生七旬紀念特刊屬爲序文紫珊先生蓋邑中忠信長者品詣恪謹行不中道其事實略見于友人錢君子泉所爲頌文而雲初繼志述事當仁不讓見義勇爲洵可謂無忝所生矣昔孟子生當戰國之世嘗慨然曰孳孳爲善舜之徒也又曰樂善不倦此天爵也邇者四方多難正爲善不可失之時機惟望雲初益勉于善仁澤所被遍於鄉邦而推及于通國積善成名則所以承先德而永後嗣者庸有艾乎夫孝思不匪人心之良知也比來學說絀繆竟以祭祀爲迷信彼西人懸遺像花果則尊之爲紀念而吾國人懸遺像鋪几筵則斥之爲迷信戕天性而昧本真其良知存焉否耶如雲初者可以風世矣

國學專修館十五周紀念刊序丙子

今茲世界一大戰國也火器日精千辟萬灌一遇戰事殺人盈野人命若草芥悲乎哉天地之大德曰生生理滅乾坤幾乎息矣昔子輿氏目親善戰之慘大聲疾呼曰人皆有不忍人之心不忍者生理也欲拯民命

先救人心欲救人心先明正學正學明而後人各安其分各得其所此古今中外之常經莫能外焉者也文治東疑讀書受教師訓弱冠潛研經訓性理志開先聖之道壯歲服官遊歷歐美自愧無裨於世強仕後奉先妣諱回籍掌上海南洋大學淬厲工業日省而月試之尤兢兢焉以道德禮義爲根本民國十年解職遂於無錫創辦國學專修館嗣易名學校迄今十有五年矣此十五年中拮据卒瘁一經濟廬之戰再經匪人之侵陵三經中日滬上之變道途梗阻爨舍飄搖然風雨如晦雞鳴不已度圖書則自數百冊增至四萬餘冊修屋宇則自十數幢增至七十餘幢屢學額則自三十名增至二百七十名至於救時之志更無日不申做諾生相與朝乾而夕惕若也橫覽東西洋諸國靡不自愛其文化且力謀以己之文化擴而充之深入於他國之人心而吾國人於本國之文化孔孟之道德禮義修己治人之大原轉略而不講或且推去而任人以挽之悲乎哉文化侵略降若疾風豈僅武力哉吾爲此懼深恐抱殘守闕終就淪湮爰於太湖之濱購地數十畝將悉力經營建茲廣廈俾文人學士之來遊茲土者觀感興起動讀經尊孔之思而吾校生徒春誦夏絃更得怡情高曠祛鄙吝而滌煩襟聖人所謂智助仁靜禮記所謂藏修息游吾中國文化或藉此爲權與其復見天地之心乎或曰斯舉也非其時而程功遠不其艱哉余曰然夫重明之光吐箴寸燧放海之波濼觴一勺我孔子論爲山曰止吾止也進吾往也斯舉也一年不成期以三年三年不成期以五年恃一心之至誠而已造物之闕也山川之富也彼其無窮廣大而不測者皆太和元氣之所積也積之時義大矣西人制器效目視求神遇冥心妙合恆自一世積累傳嬗至數世而成其鏗而不舍如此吾國民性何遠不若西人乎且夫宙合萬幾舉人生精神之所構造殫數十年之精神斯有數十年之效驗善教者使人繼其志

則夫閉鹿洞表鵝湖紹龍場之心傳與夫正人心救民命之事業當吾校三十周紀念必有發揚光大之者願吾校同人諸同學暨海內同志視茲弁言以爲息壤若夫提倡補助斯校董其成者與是編之惠錫南鍼者凡我師生成感激不去於懷也

高氏中學成績錄序辛巳

同鄉高价人先生花甲初度特捐貲設立高氏中學培植孤寒免收學費寓壽考作人之意德至厚也先聘太倉郁君梅閣爲教授兼管理郁君辭退後復聘常熟何君芸孫繼之郁何二君俱殫精教務訓迪修身立品大要作文務期理法清真故諸生皆能循循規矩斐然成章人咸曰美哉高君之教思功德爲無量也高先生與余有同氣相求之雅囑何君率諸生來附屬於無錫國學專修學校今年季夏諸生將畢業謀印課卷成績來請於余余嘉其志許之或曰學然後知不足貴乎自反也今初級中學而印成績毋迺導其自足與余曰非也凡人之自足與否在心不在迹其人而自滿也雖無成績亦沾沾焉自以爲是也其人而自謙也雖有成績正所以自省也論語曰知其所亡月無忘其所能先儒有言月異而歲不同余自十五六歲有知識以來所作文字悉數存之時時翻閱每知得力之所在有時自知其醜則面赤內愧津津然汗發於其背然則此成績者迺所以自反也抑更有爲諸生勗者人生富貴貧賤亦在心而不在迹吾心而清明廣大也處境雖約是即大富貴也吾心而卑鄙齷齪也處境雖豐是即至貧賤也昔之人有韓文公歐陽文忠公者皆寒士也而俱爲大文學家有范文正公者孤子也而其道德品行爲百世之矜式諸生誠能進德修業勉爲第一人他日有如韓文公歐陽文忠公范文正公者出於其間救國救民以增吾校榮譽是則高

先生與余所厚望諸生其慎毋自足哉

當湖雪映廬畫鑑序壬午

古今人精神所以不滅者惟書與畫以傳之畫之爲用大矣哉虞舜欲觀古人之象日月星辰山龍華蟲作繪是爲畫工權輿孔子言繪事後素太素者質之始傳於無形者也六書肇於象形蓋文者物象之本象形者畫成其物隨體詰屈是也歐美各國文字亦始於象形與中國不謀而合其心理同畫工同也吾嘗推之於五經五倫以研畫理以識鑑別易者象也象也者像也像卽畫也書金縢篇周公植粟秉圭籲天請命其至情至性可畫吐哺握髮仰思待且其至誠亦可畫詩邠風有圖鷓鴣之拮据持茶東山之霖雨其濼其皆畫之傳神者乎堯舜之世廣歌颺拜成廣之朝鳳鳴梧實其皆畫之馮翼者乎及其衰也民勞板蕩如彼棲直不忍觀流民圖矣楚屈原不得於君見石壁畫啼噓作天間隱寓鑑戒是爲君臣間之鑑瓶罍魯恥莫藝稻粱蓼莪苞枵之詩畫之愴憤矣是爲父子間之鑑夫婦倡隨雞鳴雜佩泊乎道苦谷風陰雨方舟泳游畫之涕泣臨風矣是爲夫婦間之鑑兄弟如棣華鄂躡朋友如伐木嘒鳴都可入畫以作鑑又如周旋謁襲之文趨走進退之節舜氏之三禮圖張氏之饒禮圖恨不能俯仰揖讓其間也古人爲學左圖右史歷代治亂終始與夫戰爭之蹟若左氏傳諸大戰劉項之爭鋒光武新莽昆陽之役畫之有聲有色矣漢學傳經宋學窮理周子作太極圖自無至有其畫理之最精者乎王氏良知天泉證道妙悟畫機近代曾文正立德立功立言各遺其極而其所師法者迺在聖哲畫像讀其記文知其矜式畫之爲用大矣哉縱橫億萬里上下數千年神化丹青無在非畫工無時非畫鑑也孫君秉之以當湖雪映廬畫鑑問序於余考明時孫君同宗

憲峯溪公諱雍者有靈山履歷數十頓凡宦遊勝跡靡不筆之於圖一時傳爲美談孫君紹承其志自成童舞勺以迄壯年舉凡遊歷之所經耳目之所遠心胸之所羅列胥倩法繪家圖之用自觀省而余尤有深器之者孫君之言曰人生以天倫爲重他日衣食苟完旨甘罔缺當屏絕俗紛承歡膝下以遂我初衷余聞之嘆曰甚矣孝思之不匱也白華潔養眷念庭闈則南陔之什華黍之詞不必束皙之補參之以盡足矣孟子論事親爲仁之實曰樂則生矣生則惡可已不知足之蹈之手之舞之孫君能居致其敬養致其樂則凡生理生機之暢發者皆可以圖畫傳之他日孝親圖出家庭教育於是宏人心世道於是正豈非畫經中無上之品哉謹拭目以俟之

吹萬樓文集序辛巳

居今日而言救國其維讀經乎孟子生戰國之世思有以救之大聲疾呼曰君子反經而已矣經者常道也設之於言則爲道筆之於書則爲經五三六經載籍之傳維風可觀也金山高子吹萬研悅國學與余訂交二十年矣今秋以書來曰丁丑兵燹寒舍蕩然最痛心者數十萬卷書悉燬失卒居所爲詩文詩已無存文則經門弟子寫錄先事攜出敝帚自珍請子爲我敘之余誼不容辭迺復與商量經學以抒懷易曰閑邪存誠又曰修辭立誠誠僞者人心生死之界也高子之言曰誠之爲道其體甚實而其用甚神始於无妄而終於天下格要皆起於一心而非可以貌襲其周易之旨歟孔子作春秋決嫌疑定猶與善善惡惡賢賢賤不肖是非二百四十二年之中以爲天下儀表而千古之是非正高子之言曰天下非無公論之可思乃無是非之可思蓋天下無時無公論使公論而倒置是非則足以鼓惑一世故人心之是非不存則國祚之亡

可立而待其春秋之志歟而余則更有進焉者孔子曰溫柔敦厚詩教也高子性耽詩學號其居曰葩廬嘗印余所撰詩經大義輯入葩廬叢書余常講授於國學專修學校夫詩者和平中正之元音也古太師陳詩以觀民風卽譜其辭以入於樂易傳曰聖人感人心而天下和平蓋謂此也余嘗歎秦政焚書六藝之中樂經遺厄尤酷自漢以後雖老師宿儒沈焉無復稱述所可想象而形容者惟左氏傳季子觀樂與卜子所傳樂記一篇問答坐靜室焚清香齋莊合莫雜誦葩廬樂記高吟出金石瀟灑乎其和也淵淵乎其深也浩浩乎其清明而廣大也軒軒乎不自知其手之舞之足之蹈之也惜乎吾未逮重華之朝覩其靡歌而颺拜也恨乎吾不及登后夔之庭聆其依永和聲也鼙鼓辟雍成周之遺響也鸞旂芹藻東魯之餘芬也而今不復見矣然雅頌之聲未嘗不縈繞於夢寐間也追維古經之言樂行而倫清耳目聰明血氣和平移風易俗天下皆寧豈非然哉中庸曰喜怒哀樂之未發謂之中發而皆中節謂之和夫致中和以養心以處世以教人以善固高子與余之志也今讀集中如欲廢棄三綱與疵瑕唐韓子之說大都憤世嫉俗有激而云然爰中葩廬終和且平之旨質諸高子深願吾輩交相切磋磨礱其性情消融其意氣養平恕忠厚之德揚風攷雅用以覺世歸民挽回劫運植萬彙昭然來蘇庶不負夙昔之心期也夫

江君武子本國歷史地圖序辛巳

昔孟子論國之廢興存亡其得失在仁與不仁之判而論地利則曰城民不以封疆之界固國不以山谿之險得道者多助失道者寡助至哉言乎後人讀史者於歷朝之興滅終始往往慨想流連發不平之感而遊歷名儒登山臨水考戰爭之遺蹟或紀之簡冊或寓諸詩歌於文獻不無裨益而究其實用與所以得失之

蘇則未免闕如識者憾焉友人儀徵江君武子爲余老友柳翼謀先生之高弟史地名家也余延主國學專修學校史地講席歷有年所丁丑歲患難相依雖離合靡常而關山存問未嘗稍間泊己卯春在滬復課再延君來自江北相得益惟一日出其所纂本國歷史地圖見眎余按其宗旨所在最精善者特色有三一曰超出歷代疆域沿革圖之上蓋疆域沿革不過戎索分明而江君此圖則於各朝興起全盛衰亡三時期及重要史事本末各編專圖俾讀者瞭然於目恍然於心深知運會升降之原殷鑒不遠不第爲記誦掌故而已其特色一也二曰備詳歷代國土分裂之由原國土之統一必視乎民心之統一道民心既渙智者用謀強者尙力或起或滅共爭逐鹿而國土之分裂迺如亂絲此圖於漢末隋末元末之割據三國五胡南北朝五季之紛紜形勢得失蓋然在掌夫談地學者在治世易在亂時難有定者易變遷者難此圖獨能掃盡膠轕剖析於疑似之間其特色二也三曰開交通界之權與張騫鑿空古史競稱厥後若甘英若法顯若玄奘若義淨等絕幽絕險特闢靈叢於是遊歷家探險家皆循是以作指南昔夏禹敷土奠高山大川大抵山有定位而川則隨時改流若黃河之百里一曲千里一曲一直瓠子決宣房塞經數千年不知遷徙凡幾推之各行省大川亦滄桑屢革驚流駭浪野馬塵埃造化演變出奇無窮此圖於歷代大川改流與遊歷者水陸途徑罔不詳列尤重要者各製專圖按册考蹟咸喜利便其特色三也有此三特色豈不貴且重歟而余則更有進焉孟子既垂得道失道之訓又論交隣之道曰樂天者保天下畏天者保其國自古未有不畏天之威而能保天下國家者也商頌之詩曰奄有九有受命不殆是故未有不顧諱天命而能式於九圍者也順天者存勅天命斯能負疆土余序江君茲圖綜覽歷代廢興存亡之故不禁感慨於無窮矣

李君惠農詩文集序壬午

吾鄉自明季陸陳江盛四先生講學以來一時風尚純樸士皆循循矩矱無有軼乎禮法之外者有清咸同之交此風稍稍息矣先師王文貞公崛起紹成道統學問以程朱爲宗文章以韓歐爲質蓋二百數十年以後絕學復興多士翕然景從李君惠農其一人也君既受業於先師復與文貞公之哲嗣禁言交過從甚密以道義文字相切劘先師亟賞之屢爲余言余亦心折辛亥國變後余講學於惡山之麓會錢塘施省之先生精刻十三經善本余教誦慧言與君夔校獲益滋多厥後世變日棘君蟄伏鄉閭音問疎闊乃越十餘年慧言先卒又越數年而君亦歸道山矣回憶師友之淵源繼念老成之凋謝不禁潛焉出涕也君既歿後慧言德配陳夫人佩韋以書來請曰李君臨歿時於邑而言謂吾學生無求於人惟所作詩文集敝帶是幸願以自珍儻能得唐先生一言弁其端感且不朽矣余聞之益惘然夫余雖不足以壽君文然人生當世氣節而已矣君平生行詣高尚若此微特不愧先師之高弟不愧慧言之良友抑且不愧吾鄉四先生之遺風願後之讀君集者皆知激勵名節潔身自好不至同乎流俗合乎汗世是余之所厚望也夫爰爲之序郵歸佩韋俾皮諸圖書館毋使溷沒不彰云

錢君士青全集序壬午

歲躔壬午莫春三月余僑居海上南陽寓廬廣德錢士青先生枉從惠贈文集一鉅冊且殷殷焉預訂來春遊西湖之約按其貌莊然聆其言藹然讀其文淵然以深蘆然而當於吾心恢恢然橫奮乎八表而超出乎羣倫異哉當吾世而有賢人君子且近在咫尺恨相見之晚也綜其出處蚤歲茹貧幼學砥礪修名中歲稍

展經綸遊歷異國晚年修身退藏隱居獨善與余身世不相謀而相同約其宗旨中學爲體西學爲用復與鄰見相合天生吾輩於斯時或將於世道人心有所挽救孟子曰彊爲善而已矣甲戌之歲廣德旱災爲百年來所未有先生誼切梓桑奔走號呼勸募振款設立粥廠以拯之當其始日餓斃者數十人粥粥廠成立餓者日少以至於無立德可謂鉅矣茲者敝鄉太倉迭經兵災窮民無告者嗷嗷中野慘不忍聞余亦集合同志辦理施粥廠而米價騰昂飢民鬻聚未知成績若何然亦與先生不相謀而相同也世變元黃戈鋌滿地矧飛鳥以凶民命草芥弱肉強食殆無已時然惟際茲多難之秋正爲善不可失之機會周易消息窮則必通泰卦言無平不陂否卦言傾否先否後喜吾輩同志當互相勗勉惟日孳孳不自暇逸正人心而救民命俾善氣充積劫運消除則春秋佳日西湖之約庶可踐乎今歲某月某日忻逢先生七十攬揆之辰海山月朗南極星高爰抒不文之辭敘先生之集卽以祝先生期頤之壽焉

葉君長青國魂集序丙子

造化真宰際溫煖世渾沌莫名淥水沸騰恍見百靈罔兩肆虐儻爲旱魃石言蛇圖萬怪惶惑鬼伯當門攫擊以食或有叫者請誦出出跳踉吸骨予求予枝昏墊回通黔首其咨國載營魂能無澆漓黃帝告司命曰有國在下魂魄離散汝筮予之司命對曰請以質大通抱一二子爰攝國魄追國魂會於古嘉魂之府保魄之鄉國魂曰嗟吾離矣若之何國魄曰噫吾落矣若之何司命曰合莫神山有返魂術焉乃相與促武縮氣展轉銅劍以訪於大通子大通子曰吾語汝吾國有國性仁義禮智信是也有國情惻隱羞惡辭讓是非是也有國紀君臣父子夫婦昆弟朋友是也有國寶易象詩書禮樂春秋是也有國器臨衝鈞拔藹石渠答輪

與飛船是也之數者或有形或無形誰其尸之魂實主之唐虞之時魂寄於堯舜三代之時魂寄於禹湯文武春秋戰國之時魂寄於孔孟唐之時魂寄於張許顏陸韓宥之時魂寄於周程張朱文陸明之時魂寄於薛王左史清之時魂寄於顧陸胡竹左乾坤不息國魂亦一日不息若夫不仁不智戕其魂者也無禮無義役其魂者也拙孝悌弟寡廉鮮恥俱倒其魂者也柱下史儻焉曰各歸其根靜斯復命其精甚真其中有性漆園更憫焉曰抱神以形形將自正神將守形形乃當存夫人氣浮於上則魂升離形而不知其所之古語曰作德心逸日休作僞心勞日拙德者魂之安宅也機變欺詐形神釋騷欲求國之長久非所聞也方是時抱一子借過化神人乘雲氣御飛龍而至大通子以其語介焉抱一子曰來而魄者志之榦也而魂者氣之英也國之魂魄視國智國氣轉移以爲則而獨不聞宣聖之言乎正明目而視之不可得而見也傾耳而聽之不可得而聞也清明在躬志氣如神則魂凝而獨不聞子與氏之言乎持其志者持己之志以持國之志也無暴其氣者無暴己之氣以無暴國之氣也至大至剛塞於天地而魂御其間忘者餒也助長者暴也宋人掘苗之魄死苗之魂漸矣是故暴國之氣者漸國之魂者也聖人作禮樂致中和以養國之氣以和國之魂大禮與天地同節屬乎魄者也大樂與天地同和屬乎魂者也流而不息合同而化耳目聰明血氣和平移風易俗天下皆寧一動一靜之間而國魂在焉其於人也爲五藏心者魂之舍也其於物也爲五事視者魂之郵也洪範建極無偏無陂無作好無作惡皆魂氣之正者也一國之志氣喪則自伐其魂而他人之魂伐之矣君子振志節氣節以固國魂富貴不淫貧賤不移威武不屈是爲大丈夫之魂動心忍性增益其所不能是爲英雄之魂舍生以取義殺身以成仁下則爲河嶽上則爲日星是爲聖哲賢豪忠臣孝子義士

貞婦烈女之魂載諸諸過化神人神人曰夫二子之言攝諸子羣經之魂髓矣哉吾聞六藝罕言魂而易傳言之曰精氣爲物游魂爲變古者庖犧氏通神明之德知幽明之故以此洗心退藏於密蓋藏魂於坎離之家成既濟定陰陽和均是爲歸魂言國魂歸而得其所天下歸仁天下歸魂也飛伏有位鈞命有訣升降往來一消一息七日來復天魂也履霜堅冰至地魂也人者合天地之德陰陽之交鬼神之會五行之秀氣而成魂邦畿數萬里肇域彼四海是爲國惟民所止是爲魂國以民爲魂也民心聚則國魂聚民心散則國魂散六十四卦分宮取象游魂歸魂各得其八其游於上而吉者曰晉受茲介福於其王母國魂之麗乎大明也其凶者曰大過棟樑國棟國柱折則國魂失也其尤凶者曰小過弗過遇之從或戕之則國魂如飛鳥以凶不可如何也聖人體天立極原始反終知國家死生之說所以奠天下之魂者曰誠曰神所以救天下之魂者曰性曰命子思子得聖祖之傳曰至誠如神誠者物之終始不誠無物至誠者魂之根也無物則魂不復於象爲睽所謂載鬼一車也至誠而不動者未之有也魂與魂相交於象爲同人離宮歸魂卦也神也者妙魂魄而爲言者也聖人凝魂魄以入神以神道設教而天下之魂定億萬衆之性命呼吸於吾心億萬衆之魂魄髮髯號泣於吾側彼豐屋蔀家者鬼瞰其室剝上民載碩果魂存猶且不食井澠心惻赤子將匍匐入之矣是故救民命所以貞國魂也順性命之理秉乾之精效坤之靈保合太和所以歸國魂也善養生者保其魂至千二百年善治國者保其魂至八百年吾不知誰之子作易憂患視民如傷其魂常象帝之先國魂國魄聞之豁然以寤沛然以充將返於太空屬有執一卷書懇懇款款作歌以招魂者其辭曰魂乎歸來無往南方些焦山紅海鑠石流金些魂乎歸來無往朔方些寒颺栗烈萬丈層冰些魂乎歸來無往東方些

杲杲陽谷暘死亢陽些魂乎歸來無往西方些龍蛇大陸匈結交兵些魂乎歸來還我中央些黃農遺胄瓌瓌國光些尊經道學文物聲明些矯矯特立天行自強些於是國魂得所依國魄得所憑我禹舜神州子孫黎民閩摯知能長享萬世之太平問招魂者誰八閩葉長青也序其書者誰三吳唐茹經也其時維何柔兆因敦孟陬之月將易其柔而蘇其困者句芒之神也

王君次清詩詞集序 癸未

吾嘗謂自古學派有二一曰自然派一曰力行派聖門顏子自然派也會子力行派也遞嬗至後世亦各有性之所近東晉之末有陶淵明先生自然派也廉深簡潔貞清粹溫浮游塵埃之外矜然泥而不滓千載下聞其風而慕之癸未孟秋族姪松源攜其外舅同邑王次清先生詩詞藁屬爲序言余維誦數四不忍釋曰是殆今世之淵明歟淵明之詩曰采菊東籬下幽然見南山又曰此中有真味欲辨已忘言抑何高曠若此而先生之詩一則曰會心在物外素志願耕釣軒冕非所榮箕穎自同調再則曰榮利非吾願素懷甘澹泊避世得養真高舉企雲鶴至關山月一詩激昂慷慨可與淵明詠荆柯詩並讀易曰木事王侯高尙其事又曰樂天知命故不憂淵明之志可則而先生能繼之豈非後先輝映皆能自全其天者歟昔曾文正論詩文有太陽太陰少陽少陰之區別驗之於時春融景明怡情悅性古詩云一窗晴日寫黃庭此人心心陽舒之復也扁舟一葉情緒蕭然古詩云滿江風雨讀離騷此人心心陰紆之象也先生之詩包含一陰一陽之道舉如其意而出之靡不歸於自然淵明松菊之遐思豈非雅人深致歟昔賢謂小隱則隱於陵阿大隱則隱於朝市惟其自然也先生志潔行芳奚必陵阿歟問蒼登惡山遊太湖碧然長嘯草木震動胸襟曠遠有冰壺朗

澂俯視宇宙之概說者謂惟鄉先賢高忠憲始有此懷抱高山仰止景行行止繼芳躅者非先生而誰歟抑又聞先生有田數頃征租絕不計較有以敗壞租風宜加整理爲請者先生笑而謝之曰吾雖非饒足然處境總較農夫爲優忍多取之乎深願後之讀先生集者學先生之品格以上紹忠憲之心傳庶幾爲第一等之品詣爲第一等之詩文卽以詞論亦抒寫性情非風花雪月纖佻穠砌者可比惟冀松源永寶茲集俾傳諸藝林諷誦而弗替也

聞孫蓉先生遺詩序甲

詩之爲學大矣可以寫其喜怒哀樂之懷得天地自然之音韻以興以賦莫不肖其性情而出是以古者設官採風以驗民情之邪正風俗之美惡政教之得失播之樂官聲教所及能使人視感興起故孔子曰不學詩無以言又曰一言以蔽之思無邪縱觀上下古今自毛詩而漢唐而明清有聖仙逸三品之別要之不離乎中正和平而有關世道人心者皆可信今而傳後今聞孫蓉先生澆花草堂劫餘詩數章雖寥寥無幾而雅得風人之旨其中如猛虎行及夢女之作一以見清季末葉之吏治一以見人間世父母之慈愛往復纏綿之致上繼十子而無慚先生之集不幸遭兵燹而焚如然幸留此片鱗半爪之末已足概況其風世勵俗之旨必傳無疑矣按先生曾任丹陽縣教諭數年倦勤返里嘯傲林泉輒與徐菊老及先師王文貞諸公倡十老社月必有會會必以詩故卷帙之積不下三千餘首而親自甄錄者尙存七百餘首今先生歸道山已久澤遺其子姓者甚厚其必有以慰先生而刊行矣余以佩褱表妹介其聞氏母夫人之請誼不獲辭謹爲之序云

錢君躬行詩存序甲中

執友錢君誦三別字躬行仔肩吾婁地方事業勤勞以致余既爲墓銘以哭之踰數月其文孫孫型郵君詩存五卷來曰此吾祖所留遺也僅存於劫火之餘敢乞先生一言以爲序余維杜老懷謫仙詩云渭北春天樹江東日暮雲又同谷七歌詩云山中儒生舊相識但話夙昔傷懷抱余避地溷濱對於錢君每深春樹暮雲之感君偶來溷同話舊事相對欲歎今君逝矣撫君遺墨能不愴愴君自述作詩原有二千餘首及文稿二百餘篇際丁丑之變盡付災如厥後回鄉多方搜集祇得寧遠義莊文存等數冊洎避兵溷上又每日作詩一首以排悶兩年積成七百餘首庚辰辛巳回鄉後又成三百餘首共存一千零二十八首題曰躬行詩存半生事蹟略具於斯嗚呼君之業可謂勤而其心則尤可悲矣天厄吾人既不生於乾嘉文明之代而獨生於邦家阨隍之秋何其酷乎雖然時局元黃之會天必生君子人以維持正氣於不敝又必發爲詩文以傳當時文獻於永久君之詩文雖出於斯文寥落而於患難之情狀邑事之變遷人物之代謝均可著爲掌故俾後來者歷歷可稽豈非維持正氣於不敝者乎杜老詩云我生何爲在窮谷中夜起坐萬感集嗚呼嗒矣月前又聞友人武進錢名山君之喪名山黃冠二十餘載嚼然泥而不滓二錢蓋不相謀而適相感吾鄉陸桴亭先生詩云郊原小麥青青秀不見歌聲起故宮余既痛故交之零落又悲身世之飄蓬俯仰低徊瞻懷周道曷禁潛焉出涕乎雖然余既爲後死者則所謂發爲文章維持正氣於不敝者非余之責而誰屬乎况吾婁雖遇亂離猶不乏優秀瑰奇之士陸陳江盛四先生提倡性理正學攸傳去賢人之居若此其近焉得曰無有乎爾爰揭君未竟之志以諗方來

唐氏孝友樂善圖序甲中

天地何以恆久天下國家何以長存善氣而已矣善氣之在人間世扶與旁薄終古不息得之者昌失之者亡上下數千年未有或爽者而必自家庭孝友始甲申孟秋宗姪松源以先德孝友樂善圖見眎蓋武進同宗企林君所繪者也共分八事曰燕翼鍾祥蓋宗人行善實始於子良公溯厥大本不容偶忘者也曰儉色候門蓋吾弟申伯值子良公晚歸必倚門拱望待其至而敬扶持之也曰同心尙義蓋申伯長兄鄒鄒仲兄保護季弟紀雲行好善成性週鄰縣及各省水旱凶荒輒繞室旁皇相對飲泣相誓救濟必使溝瘠獲蘇而後已曰協力濟災當辛壬癸甲等歲豫陝縣魯濟寧院蘇泰興靖江深陽等處告災保護申伯兩弟亟聯合薄仁意善會紅卍字會諸紳耆選幹員分赴各地施賑而敝鄉太倉崇明兩縣同遭災設文治請於保護申伯兩弟一體賑恤至今口碑敬道曰獨修圩岸吾邑天下市界涇孔家等圩因歲久有崩潰勢又天下市黃梅夾山幹河水道淤塞申伯弟延請施君襄臣蔣君歐葆分別築堤疏濬樂利所及數千戶咸慶安堵曰菩提菴壽申伯弟晚年靜參釋典既於邑之東北鄉創建蓮社以爲一人守戒則天地間多一善人廣種福田兼自修慧業功德無涯矣曰肩壽雙清曰青箱傳業申伯弟化行門內弟婦蔡夫人調理贊襄同心施予上則相夫以施惠下則教子以義方戚鄰交稱無愧賢母而松源姪曲體親心致謹於溫清定省之餘視聽於無聲無形之際識者方諳蔡氏雙孝子殆無間然以上皆企林君所傳神而文治竊有進焉者周易家人卦傳曰父父子子兄弟弟夫夫婦婦而家道正正家而天下定孟子言良知良能達之天下又言大舜善與人同君子莫大乎與人爲善蓋自古聖賢之志不徒以孝弟修之一身必欲推暨之於天下古語曰百善孝

爲先則必體孝道以爲善可知矣吾宗自子良公後孝友樂善相傳弗替惟望松源經以此志益修於一身達於一鄉並達於一國久之善理善機善氣充周於寰宇庶幾如孝經所謂天下和平災害不生禍亂不作易傳所謂保合太和各正性命文治既兢兢自省竊以之勉松源勉同宗並勉一國之國民行將拭目而望太平之期不遠也

野航吟稿序 甲申

吾婁詩學當明季時推爲極盛風洲梅村頡頏相望藝林之士來吾鄉者靡不崇拜詞壇奉爲詩史厥後平陽遂有婁東詩派之稱風行海內矣友人野航吳君閩侯陳石遺先生之高弟也陳先生詩話詩集等早已膾炙人口君本其家法別開生面盜石老詩澹遠蒼古而君則細膩風光吐屬蘊藉各擅其勝昔司馬子長編遊名山大川文章遂卓絕千古溯君自壬子歲以來北上燕京瞻泰岱入洛陽涉黃河之險探星宿海吞吐煙雲時發其胸中之抱負悉寓之於詩甲戌丙子間余延君佐理國學專修學校梁風景助君吟詠意時局元黃烽煙倏起君避地溧陽越半載後始展轉回里行篋詩囊都歸散佚君思之不無太息焉宋黃山谷詩云滄江靜夜虹貫月定是米家書畫船天產奇姿必有時而發現甲申之春同鄉嚴君遂先以所藏各家詩跡君計鈔君詩不下數十首君得之喜甚復於各處搜集若干首蓋以劫後悲吟名曰野航吟稿其門人某君將爲之刊行余維嚴君之致於友誼與某君之篤念師門均可嘉與故略序君之平生以爲弁言並以見吾婁詩派之有傳人云

陳君徵宇詩集序 甲申

光緒壬辰余服官京師即聞福建三解元之名三解元者鄭蘇龕同年林噉谷京卿暨吾友陳君微字也又聞光緒庚寅陳仲勉先生暨微字父子同會榜黜稱一時洎官戶部得交仲勉先生其氣粹然以和其德淵然以靜望而知爲端人長者比入總署又得交微字權然如舊相識共事五六年公牘文字互以相示長官許竹簣袁爽秋兩先生留意人才皆器重之壬寅余隨使英倫微字適隨張德彝號載初星使駐英國充當參贊彼此握手縱譚幾忘旅居他國也張星使雅重文士交涉文牘悉委諸君多所建白微字由是精通英語迨任滿微字回國值辛亥國變士大夫爲之短氣又越數年國事蜩螗余赴京觀政訪微字則意緒闌珊無復曩時寢興矣又越十數年忽聞微字逝世爲之愴然又越二年余避地滬濱其妹婿趙君泉澄倍其德配陳懋恆女士持微字詩集來問序於余懋恆微字之胞妹也追述往事彼此欷歔不置亟發讀其詩與李杜爲近有時硬語盤空彷彿退之山谷也嗟乎世界元黃之會惟賴有人才砥柱其間至於見賢而不能舉而爲之而不能先孰尸其咎乎人不能與天爭而亦不得不與天爭當光緒末造吾輩蒿目時艱常欲知其不可而爲之而卒無補於國是一敗壞於甲午之輕戰再敗壞於戊戌之政變三敗壞於庚子之拳禍國家元氣斲削遂盡此皆天也氣數之無可如何者也然而不得不盡吾心力者人也可可以人勝天也詩三百篇下逮離騷忠愛悱惻讀之有令人感泣者自古莫不然嗟乎人心不泯其終可以回天乎微字之詩忠愛殷拳之意隨時流露余既悲君之志又追念交誼之深爰序而歸之後世誦君詩者論其世知其人其亦有感慨於心而奮然興起者乎

孫君壽成三十週從戎紀念序癸未

古者兵農合一文武同階入則爲卿出則爲將俊秀髦士無非公侯干城施及春秋猶仍其制魯頌泮宮之詩曰矯矯虎臣在泮獻猷卽後代之軍官學校也國語載齊有國子之鼓高子之鼓國高齊之世卿豪族也此彭彭可考者清光緒三十二年蘇撫陸春江奏辦徵兵剗除晚近重文輕武之習於是蘇松太三郡士紳參訂優待規則以作士氣翌年陳公筱石來撫我邦又奏辦陸軍隨營學堂甄錄百人入堂肄業儲爲國器一時濟濟多士颺舉雲從拔軓恐後人皆曰革新我謂師古軍國民之意焉嘉興孫君鎔成弱冠君發穎監聲譽鶴起旣而棄儒投筆膺徵兵之選出入於戎幕者八年癸未之夏孫君出畧三十週從戎紀念巨帙來徵文余作而嘆曰洵可爲豪傑之士矣吾鄉先賢陸桴亭先生丁有明末造提倡理學兼習兵學八陣發明一書至今膾炙人口共投拾擊刺之法父老猶有傳述之者曠代大儒若亭林船山梨洲輩經文緯武之學無何不賅孫君旣有邁往之精神斯有貞固不搖之氣象其儒而軍時也解組而歸儒亦時也夫天道三十年一變人事滄桑因之轉移余服官京師丙午歲奉諱南旋監督南洋大學厥後兼任蘇州存古學校並鄉自治公所事宜必月之蘇以承其乏猶憶吾鄉恂恂子弟參與徵兵之役者羣傑偕來問字於虎邱之麓追維往事益深鴻雪之感瀏覽茲編悵觸余懷豈第尋常紀念云爾哉

蕪屋泉先生師生畫展集序甲申

畫者心之表也心有瑰琦磊落之懷則其發爲畫也必有雄奇卓犖之概心有泮奭優游之度則其發爲畫也必有夷猶澹宕之神而其闕肆之趣則在登山臨水鬱積其胸中抱負而兼採博攬其勝漢司馬子長少年時游江淮登會稽探禹穴浮沅湘涉汶泗講業齊魯問爰成史記一書吐其胸臆此文也實心之表也術

陽蕭屋泉先生名畫師也夙性好遊傲子長之意中年溯湘水抵長沙陟嶽麓然猶以爲未足也又涉洞庭登岳陽樓縱渡漢江越湖口探石鐘馬當小孤諸名勝猶以爲未足也旋下蕪湖出洋山磯浮皖水攬九華大龍諸峯之秀而金陵而京口而錫山惡菴而杭州西湖瞻飛來峯數石刻羅漢然猶以爲未足也觀錢唐湖旋入富春開闢南至番禺眺羅浮四十二峯縹渺雲中恍若仙境先生飽收眼底抱吝益悶然猶以爲未足也復北極幽燕訪居庸之巖險有一夫當關萬夫莫入之慨慨然思中外界限益嘆秦政策長城雄才大略非後人所能幾及然猶以爲未足也每恨足跡尙不能徧宙合龍門會稽陽朔獨秀玉壘峨嵋以及歐美海外諸邦輿夫葱嶺南北天地之際未能躬歷僅賦臥遊然聖人有云智者樂水仁者樂山想象之餘得意焉足矣蓋司馬子長遊名山大川皆爲文具而先生遊名山大川則皆成畫本是殆吾國所不可多得者歲躔甲申爲先生八十攬接之辰諸同人僉謀稱觴爲先生壽先生堅辭不許於是譚君瓶齋夏君劍丞請先生舉行畫展於海上一時來參觀者接踵摩肩盛況鮮匹而及門弟子若古瀛施君扶九毘陵談君雲觀奚君逸俊蔣君成俊雲間鍾君道英梁溪孫君令蘭及其哲嗣鍾祥女孫利珠等醴贊印行蕭氏師生畫展集來問序於余余維先生誕逢衡陽唐韓子嘗言衡山爲中州清淑之氣所鍾蜿蜒扶輿旁薄而鬱積其神氣所感生白金水銀與夫橘柚之包竹箭之美千尋之名材凌霄蔽日可供清賞者必當有人焉畫之以寫其真迺邇而至永州山水殊趣唐柳柳州曾作八記俱有畫意而宋蘇子瞻前後赤壁賦於繪形繪影繪聲繪色諸法咸備而尤妙在繪空此又也而俱傳畫意黃山谷詩云滄江靜夜虹貫月定是米家畫船先生當之其無愧與抑更有進者方今嘷鴻飛鳴瞻烏靡屋流離瑣尾之同胞不可勝數昔鄭俠流民圖其慘恒

當亦猶是先生其必曲給近日流民之狀而登諸衽席其感入人心者當更有以勸其博濟之懷而兼與人爲善之意爰敘而書之賀諸先生與扶九諸君當亦許爲知言乎

南郊送別圖序甲中

禊亭七叔以南郊送別圖見際蓋禊叔作宰崇德縣瀕行時地方紳士吳待秋君繪圖以贈之而江右散原老人題其卷端者也觀其襟懷臥轍依依不舍之狀則知其勤政愛民閭澤之入人心者深矣而三代直道之公於今不泯尤可見焉康誥曰如保赤子孟子曰赤子匍匐將入井斯民皆吾赤子也古今鴻噉于野流離轉徙者慘狀何可勝言矧飛鳥凶戾火器肆毒裂肝碎首廬舍爲墟目不忍睹耳不忍聞儻長民者以禊叔爲矜式則國民之幸福多矣禊叔自退居後對於梓鄉疾苦挽救尤多如鄰軍過境招待周至不使秋毫擾及閭閻又如錢糧加征等侃侃力爭吾鄉實受其福多有人所不及知者潛德幽光久而必發然則此圖豈特紀念而已詩曰老成典型後進之士皆當奉爲典型者也謹綴弁言用申景仰

百蘭圖畫冊序甲中

太私之保合善氣而已矣善氣之彌綸由家而鄉而國舉世薰蒸之皆如入芝蘭之室而爲善人矣甲申重九節宋君人英以百蘭圖畫冊及所著詩介及門薛生思明來屬爲弁言余維易繫辭傳曰同心之言其臭如蘭屈子有言緜秋蘭以爲佩蓋以蘭爲國香亦卽國性之所繫人服其氣蔚爲君子之澤久而與之俱化充善氣以感善心也宋君爲近今名畫師茲繪百蘭圖其將由一鄉一國之善氣擴而爲天下之善氣乎惟孟子言良知必自家庭孝弟始胥末廣微補南陔詩曰循彼南陔言采其蘭讀斯畫者其必敦崇孝行培養

其良知哉

復旦大學政治學系行政練習序乙酉

政治學權輿於聖門論語子路一篇包括行政要領而顏淵篇先開其端聖人三答季康子之問其言曰政者正也子帥以正孰敢不正又曰苟子之不欲雖賞之不竊子欲善而民善矣皆寓本身作則之義而不欲尤爲大要故子路篇又曰苟正其身矣於從政乎何有後世爲民上者其能不欲乎其能正其身以正人乎儻皆能奉聖訓以爲法則國治而天下太平豈難致哉執友陳君仲達篤奉聖門家法精研經史及近世政治學余掌吾婁太屬中學時敦聘爲教師及學監諸生翕服奉爲圭臬旋出宰本邑嘉定縣兼任無錫縣縣長清廉公正有口皆碑去官後擔任復旦大學教授歷有年所今春以所著復旦政治學系行政練習講演集見畛屬爲弁言余受而讀之閱深肅括條理秩然而愛民之誠溢於言表不禁作而歎曰陳先生洵無愧於聖門矣論語言舉直錯諸枉則民服斯民也三代之所以直道而行也孟子紹其傳昌言曰民貴君輕而梁惠王一篇自古之人與民偕樂章以下屢言民字更僕難數夫天生民而樹之君蓋爲民經理萬事者也三代之世聖君賢相所以兢兢業業者無非欲保乂吾民而已後世不知此義於是虐民殄民吸民之脂膏燧民之生計吁此吾民之所以保抱搢持以哀籲天者也世之學者苟能體仲達先生之意研究政治常以愛民貴民保民爲心救民於水火之中則困苦者變而爲康寧憔悴者變而爲愉樂夫禮運大同之治豈空言所可緣飾哉竊願學者家置仲達先生行政練習一編而無忘救民之宗旨興孝興弟興仁興讓行見數年之後吾民皆鼓之舞之拜甘棠之嘉惠含和吐氣被福祉於無疆矣

增訂古文觀止序癸未

余於有清末葉長南洋公學兼監督吾鄉太屬中學憶在己酉庚戌之歲及門嘉定吳君拯寰寶山君西華聖哲發穎登國文成績斐然可觀余激賞不已在舊三十餘年人事滄桑回首前塵楓深鴻雪之感今歲夏五學友陳先生仲達以太中舊同學吳君拯寰刊印之增訂古文觀止八卷出例目問序於余仲達先生當時余延聘爲太中國文教授兼訓育主任者熱心樂育多士翕然稱誦余甚佩之按古文觀止三百年來家絃戶誦之書也自周秦以迄宋明粗具規模爲老師宿儒常循誦之茲編得金君熙章增輯清文吳君拯寰悉心校勘置君西華析疑辨正加以每篇均有段落研究法指示徑塗洵足爲後學津梁矣余以爲初學求文章進境法宜先審陽剛陰柔之旨以爲基礎其法倡自桐城姚先生姬傳湘鄉曾文正濂生衍爲古文四象曰太陽少陽曰太陰少陰屬於太陽氣勢者曰噴薄之勢跌宕之勢屬於少陽趣味者曰詼詭之趣閒適之趣屬於太陰識度者曰闕括之度含蓄之度屬於少陰情韻者曰沈雄之韻悽惻之韻歷代有數文字莫踰此數者範圍古文觀止初爲童習之書而舊選之文例如武侯出師表歐陽瀟岡旣表一忠一孝爲日月不刊之作推此意以求義烈節行乾坤正氣未始不在於是矣晚近以來文運衰替發古文辭者稍稍息矣廢繩墨變發率往往教之不盡其材屢至聰明優秀之子恆苦桎梏其心思末由涉藩籬而窺堂奧語曰取法乎上僅得其中余常以第一人格第一文格勸勉諸生竊願爲賢父兄者愼毋曰求淺求淺致吾國民日流於下達也

元曆紀年法序乙酉

孟子言天之高星辰之遠苟求其故千歲日至可坐而致故者自然之迹易傳言日往月來寒往暑來往者
屈來者信屈信相感而利生利者亦自然之迹也人生世界間惟純任自然彌乾坤之缺憾始爲克盡其實
任宋張橫渠先生所謂爲天地立心爲生民立命是也王君亢元爲余執友禹卿先生之令嗣以所編元曆
紀年法見畧余閱之上下今古精覈無倫允稱傑作矣顧吾謂編曆法者固貴乎博稽周考而得其平尤在
寶貴此歲月日俾俊民用章家用平康堯典命羲和定曆曰允釐百工庶績咸熙可見古聖所注重者在百
工庶績周易首載乾元亨利貞凡人有一世之元亨利貞有一歲一月一日之元亨利貞吾人盡道其間庶
可握世運之綱維修養日月之德行王君之作意在斯乎然則盡道者當奈何一曰爲學一曰爲
善吾讀論語而得其要旨焉曰學如不及又曰見善如不及蓋學問之事不進則退皇皇汲汲以求之勉勉
循循以赴之猶恐或失故宣聖終日不食終夜不寢以求學也善因善機稍縱即逝孟子言雞鳴而起孳孳
爲善實寓日邁月征之精神矧夫生斯世也爲斯世也巡行原野則鴻鴈哀鳴矣縱覽近郊則屋烏靡止矣
拯斯民於水火之中正近時大好良機也禹卿先生樂善不倦出於天性每遇水旱凶荒鰥寡孤獨廢疾旁
遺隱貧無告靡不盡力以周恤之王君恪守過庭之明訓熟聞濟衆之良謨必能以禹卿先生之志爲志而
有以引申之擴充之光大之有馮有翼有孝有德則善氣之彌綸當充滿於寰區之內豈第一鄉一邑已哉
易傳言積善之家必有余慶詩小宛篇曰夙興夜寐無忝所生亞聖言事親從兄之實樂則生矣生則惡可
已不知足之蹈之舞之生機之洋溢近之在倫常行習之際遠之在茅簷蔀屋之中王君善承親意勇
於爲善日計不足月計有餘吾知其自茲以往日新而月異又將月異而歲不同善果之積纍纍於無窮矣

王君其勉之哉

野園題詞序乙亥

月之望日門人率賢謝逸民持野園題詞一卷來乞序于余曰生有母校之師王性佛先生者七齡失怙惟母是劬以長以教荷恩罔極今與其季冷佛先生築野園一所以娛親園成廣徵海內題詠達五百家將付梓俾能壽親于無窮其孝詣有若是以夫子之碩德厚望且以孝道爲教可不錫以鴻文乎余聞之喟然嘆曰孝之爲義大矣哉孝經曰人之行莫大乎孝中庸曰立天之大本大本者孝是也近世非孝之說披靡諸夏爲忠胡可勝言故嘗著國鑑國箴及孝經大義等書以正告國人至于人子之孝親尤以時養爲貴語不云乎樹欲靜而風不定子欲養而親不在又云祭而豐不如養之薄也如昔王哀之廢讀蓼莪歐陽仲實之每祀涕泣其嗟痛爲何如然養父母須以廉潔爲主儻效非義之財以豐口體之奉此則悖乎白華之所稱道矣可乎哉今王君昆季身不游宦家世耕讀斥其自力之資點綴家園適母居處吾故知其能潔養也若夫園卉羅列亭榭幽勝春暉彌永光景長妍奉母其間頤養天和以視王歐諸先儒之失養者復何幸哉呂氏春秋孝行篇載曾子之言謂孝有養體養目養耳養口養志五者代進而厚用之可謂孝矣王君昆季豈非能養體養志者耶且又梓行題詞佈遐傳久非徒壽親且可勸世洵可謂孝子不恆永錫爾類矣夫家庭之庸行實宇宙間之明德也良知之發當必有開風興起者

明季忠節貳臣字蹟跋辛巳

天地之間正氣與邪氣迭爲消長而已正氣盛則國治且興邪氣熾則國弱且亡周易泰否二卦消息一則

小往大來一則大往小來君子小人之消長古今治亂之大原也危乎微乎豈不大可懼乎及門朱生祀瞻余表姪也篤志嗜古富於蒐羅一日持其所藏明季忠節貳臣便面見眎共數十葉屬爲題辭夫祀瞻之志豈第好蒐藏而已哉晚近以來士大夫品詣不修名節不講脂韋軟媚隨俗遷移而世道人心遂如江河之日下夫氣骨者立身之根本也其處也有氣骨自立於宇宙之中其出也乃能立國於世界之內宋文信國所謂地維賴以立天柱賴以尊是也祀瞻之辨別薰蕕意在斯乎意在斯乎

明楊椒山先生手蹟跋癸未

嗚呼正氣之在天下曷嘗一日息哉自孔子作易坤卦文言傳揭正直之訓孟子發明浩然之氣至大至剛配義與道於是氣節之士史不絕書宋文文山先生作正氣歌立萬世綱常名教大防千載下爲之歌泣明楊椒山先生遙承信國氣壯山河開左忠毅史忠正諸公之先讀乾坤正氣集廉頑立懦豈非聖賢所謂成仁取義者哉余少時應春明試赴京師住球芝巷太倉會館恭謁椒山先生祠與郡館密邇僅隔一街登諫草堂瞻仰石刻疏稿勁嚴嵩二十四大罪字跡勃勃有生氣又見先生撰書鐵肩擔道義辣手著文章石刻對聯肅然起敬張夫人粟主祔祠於後救夫疏稿石刻亦嵌壁間聞吾師浙江黃欸蘭先生與南皮張香濤制軍宗室寶竹坡學士名儒何來壽太守居北京時逢每月朔望必肅衣冠拜先生祠以崇正克邪相誓勉迄今六七十年殆無有能道之者矣既讀先生集載先生當廷杖時有人贈蝮蛇丹以壯之先生曰椒山自有膽何必蝮蛇哉嗚呼湯文正有言天地抑邪與正之心雖當昏亂之世不容盡泯益見正氣不絕於人心惟賴氣節之士相與維持於無形之中明代當萬曆時摧殘正氣動輒廷杖大臣竊怪其待士大夫愈酷而

正人義士轉接踵而起者何哉正氣彌綸而人心不死也然自是厥後宦箴日熾明社遂屋痛乎哉君子小人之進退而國脈興替隨之可不慎哉癸未仲秋及門黃生漢文將家藏先生手蹟五絕詩屬爲跋讀其詩有瀟灑出塵之概文治何幸得附名簡末謹跋數語用以自勵並勗漢文與後來學者養浩然之氣以擎天柱而張地維云

石刻王陽明先生遺像跋壬午

陽明先生講學關鍵在天泉橋一證其門人錢德洪緒山述師說云無善無惡心之體有善有惡意之動知善知惡是良知爲善去惡是格物同門王畿龍溪云不然心體既無善惡意知物統歸於無泊陽明先生出二人請質陽明先生喜曰正當有此一問王畿所言是吾接待利根人教法德洪所言是吾接待鈍根人教法但王畿應在著實處用功德洪應在虛靈處注意庶可相需爲用厥後龍溪先生所傳謂之四無教緒山先生所傳謂之四句教而龍溪享壽九十餘明末講學諸家拾其流弊於是無善無惡三教合一之說公然無忌余於性理救世書中已詳論之因而別有感焉子貢言聖門性與天道不可得聞心性之學孔子僅於晚年論易中及之而孟子道性善暢言心性之學豈遠聖教哉蓋春秋之世禮義教化猶存似魯國猶秉周禮士大夫服膺禮教散見於左氏傳中甚夥故詩書執禮之訓尙多逾行者至戰國時爭地爭城殺人盈野人道幾乎滅息故孟子大聲疾呼直指良心本心又直揭良知良能以警醒當世蓋非如此不足以振人心也宋朱子之教孔子之真傳也宋陸子明王陽明先生之教孟子之真傳也此應時施教之法其救世苦心一也今日一大戰國之世也其要旨在訓練國民之知覺而知覺非以善良爲主則恐流於機械變詐孔子

曰不逆詐不億不信抑亦先覺者是賢乎夫逆詐與億不信非機變之巧乎孟子論伊尹先知先覺其本在非道非義一介不取與故欲訓練國民之知覺必先之以善良衷之於道義尙公正清廉而後其知覺周乎萬彙可以應行而不窮陽明之訓曰致吾心之良知於事物物正其不正以歸於正是必先正己之知覺而後能正人之知覺拔邪妄之本塞利欲之源是今日教民善國之良藥也世有提倡陽明之學者聖賢之徒也歲躔壬午爲余重宴鹿鳴之期及門陳君柱尊贈余石刻王陽明先生遺像本爲善化唐鏡海先生所藏案唐先生爲咸豐中興時名臣與倭文端吳竹如諸先生俱篤守程朱之學者而尊崇陽明先生若此其無門戶之見可知柱尊贈余奚啻百朋之錫爲之距躍忻喜爰謹志之揭明道統之淵源云

繆文貞公會試遺墨跋甲中

文治幼讀定興鹿太公乙丙紀事心嚮往之洎由太倉遷居無錫訪東林舊址不禁往復徘徊爲之流涕前年無錫同鄉顧君彬生屬題顧端文公會試卷手蹟敬題數語以爲附名驥尾爲平生幸事茲又得觀江陰繆文貞公會試遺墨與顧端文公試卷可稱雙璧得署名卷末又大幸矣抑更有進者前文治搜集有明氣節之士遺著共十餘種內吳中周忠介公燼餘集已爲重刻一通今刻版尙復完好繆文貞公遺集尠見於世儻有賢豪同志搜集而梓行之實不朽之大業也

婁東十老圖跋甲中

壬午歲及門江陰孫君煜峯贈余婁東十老圖余特爲之記甲申春及門劉河朱君紀瞻別繪十老圖見贈較原圖拓而大之又附繪拙照於後云道統之相承也余喜不能釋二圖皆家寶也嗟乎十老當時聲聞開

潛迄於今日稍稍復顯於世人心之向往正學於斯可徵矣若云道統相承文治何敢當惟有努力進德自勉以勉同志俾吾鄉後進聞風興起知所矜式此則余與朱君所厚望也朱君並擬將梓鄉文獻分別詳繪如四先生祠沈卽山先生祠等均付丹青並爲之詳記其有功於後嗣益復無窮矣

朱氏傳家樂善圖跋甲中

人之所以爲人者倫而已矣而人倫之本孝而已矣詩曰永言孝思孝思維則漢延叔堅仁孝論曰仁人之於孝猶手足之有腹心枝葉之有根本也孝之爲義大矣哉及門表姪劉河朱生祀瞻精研給事可稱名畫家甲中之冬出其所繪先德洲舟表伯逮其尊人厚庵表兄行善諸大端約舉之有數事曰助賓興曰設劉涓文社曰勸建集善堂曰修七義祠曰恤癯曰救生曰新鎮故居紀念若夫厚庵表兄遺蹟曰設習善義塾曰集雅客賞荷至於蘭爲國香又擴充先人澤蘭書屋而皮藏家訓書畫遺墨於其中夏集裝潢勸勉持示余不禁起敬曰斯非特雅人深致益可見朱生孝思之不匱矣古訓有之孝子壹舉足豈出言不敢忘祖考父母朱生其得斯意歟鄭康成先生六藝論曰孔子以六藝題目不同指意殊別故作孝經以總匯之余謂覽斯圖者感於朱生之孝思皆當熟讀孝經孝行充塞乎乾坤則天下和平災害不生矣竊願朱氏子孫勉旃後之有志於世道人心者共勉旃又是圖未有標題竊擬之曰劉涓朱氏傳家樂善圖未知有當未也

唐君穗卿遺象跋己卯

余於光緒壬寅隨使歐洲得交同宗心奮君於巴黎恂恂儒雅品學兼優己卯歲講學海上又得交心會令弟執夫君洞達世界大局議論閎通金玉昆允文允武心竊佩之一日執夫賚其尊公穗卿先生遺象手

蹟見眎屬爲跋文余見而歎曰信乎積善之心獲報也先生平生經歷事變辛苦屯遭而精神百折不回其遺墨有曰灰心名利惟行善可以積德至哉斯言比年來龍戰元黃烽煙遍地是蓋天與我以行善之機儻失此善緣而不爲是違天也心奮執夫永言孝思必能繼志述事有以光大而揆張之孟子曰仁義忠信樂善不倦豈獨善其身哉將傳嬗學說以善國性也回憶二十年間先大夫嘗訓文治曰君子之澤止於五世無論家國未有歷數世而不變者惟積善可以長久與先生言若合符節竊願與心奮執夫共實家訓以保我後生

陳君幹丞林下課孫圖跋己卯

天地間保合太和之氣孝慈而已矣孝出於天性慈亦出於天性上愈慈則下愈孝太上貴德其次務施報大學言孝弟慈引康誥保赤之文斷之曰心誠求之雖不中不遠是爲孝慈相感之證北流陳子柱尊以其尊人幹丞先生林下課孫圖見眎余讀之歎曰慈孝之相感有如是哉蓋柱尊王父秉禮先生嘗設義學於梅花書室凡貧不能學者咸來受業柱尊之尊人幹丞先生繼志述事講學數十年凡邑中諸學校皆其所創設而柱尊暨一百篤守家法廣被仁風一百嶄然見頭角自無錫中學而金陵大學而美國康奈爾大學凡十餘年及歸國任上庠教授主任聲譽昭著非先生義方之訓漸漬無形曷臻此抑余更有爲一百輩勉者孝經曰昔者明王事父孝故事天明事母孝故事地察余向讀之未詳其奧旨及讀禮視於無形聽於無聲然後知訓練心思之精細卽在晨昏定省之時吾人練習腦力以道德西人練習腦力以物質其理雖一其分迥殊柱尊平日以孝爲教推及於子弟推及於門人將來推及於天下太和之氣洋溢寰區非吾中

國之福與一百輩亦皆受業於余必能式穀邁征引之弗替大雅既醉之詩曰孝子不匱永錫爾類文王有聲之詩曰詒厥孫謀以燕翼子詎非幹丞先生之教澤流傳哉

雙梧館秋課圖跋庚辰

雲間吳君丕續任上海交通大學教授兼任無錫國學專修校課宗旨純正教思懇懇一日屬北流陳生柱尊介紹以雙梧館秋課圖記見詒請爲跋文余受而讀之俯仰陳蹟往復流連承先啓後之思溢於言表不禁重有感焉乾坤和順之氣慈孝而已矣大學言齊家治國之本惟孝與慈孝者所以承先也慈者所以啓後也小雅小宛之詩周大夫憂時傷世之作也其首章曰明發不寐有懷二人孝也其三章曰教誨爾子式穀似之慈也其四章曰夙興夜寐無忝爾所生則合慈孝之精神而兢兢焉終身自勉者也天地之性係於人倫雖當衰亂之世不容稍有磨滅故凡茲慈孝之理漸漬於民之秉彝固結不解而成爲國性有士君子出因國性而善導之而提倡之蔚爲風俗於是乎慈孝之道無中外無古今傳燼而不息而承先啓後之責爲祖若父者皆欲教其子孫爲子若孫者皆欲繼其祖父綿綿延延遞至於千百葉而无疆周易大義碩果不食又曰復其見天地之心其是之謂乎世衰道微家庭教育雖摺紳先生亦雜言之矣吾得斷之曰雙梧館慈孝之地也秋課圖記慈孝之文也吳君之志慈孝之志亦猶周大夫憂時傷世之懷也時值重陽滿城風雨嗟葭蒼露白之思與蘭秀菊芳之感披圖操簡益覺余懷之渺渺而不能已也

錢君孫卿私乘跋癸未

士君子際患難之會其責任在保全城鄉蓋保城鄉即以保民命也昔伊尹自任以天下之重吾輩不得位

惟有自任保鄉邑而已若夫潔身遠行肥遯鳴高於心能無恸然哉吾友錢君孫卿躬際末造時局元黃輒以保衛城鄉自任平居不撓不屈氣節屹然乙丑歲蘇奉交闕岌岌將攻城孫卿於歲杪夜裹楮幣萬金縋城謁奉軍當道某君笑曰此誠所謂雪中送炭也卽引軍去當是時余適丁先嚴憂孫卿慰余曰城中決可無恙余爲感激零涕而楊君翰西亦於此時率鄉團保衛城垣鄉民均慶安堵嗟乎孫卿與楊君之功偉矣向令高尚其事退然謝不敏誰得而咎之而孫卿與楊君適居商會要職城鄉賴以安全豈非吾鄉之幸福與前明太倉陸梓亭先生作治鄉三約於保鄉之務策畫不遺餘力孫卿蓋得先賢遺意矣錫邑素推高忠憲公忠憲與尊道先生雖非同時而道統相傳淵源一脈孫卿實師法忠憲抑亦景行尊道者歟詩曰維桑與梓必恭敬止夫敬恭豈矯飾文貌之末歟癸未夏孫卿與余皆避地海上出所記私乘以示余易傳曰作易者其有憂患乎孫卿此記亦素患難行乎患難之志也余夙昔講學以正人心救民命爲宗旨然徒託諸空言孫卿此作蓋救民命之大要余特題其簡端俾後來有志之士皆以鄉土爲重人人有自保之志吾國庶有豸乎